

陳確菴先生集

確庵集序

嘉隆之季吳中文章家以敵華浮豔為能事先
甫守其樸學言稱古昔與其常布弟子端拜
于荒江寂寞之濱于是吳中有歸氏之學逮及百年而
確庵陳子挺生于百里之內磨礪名行礱斫經術學者
頷然奉為大師人皆曰確庵子今之熙甫也確菴子願
不自以為足捧其所為詩文過而問于蒙叟讀之決



旬撫心沉思泣然而歎曰昔者吾夫子知道之不行刪
詩書定禮樂翼易象六經之道大備春秋既成使曾子
抱春秋河雒北向夫子齋戒向北辰而拜告備于天六
經禱矣至春秋而始告備者何也斯義也唯文中子知
之曰春秋抗主而尊魯其以周之所存乎春秋成而周
存存周者天也故曰以告備于天也元經之作也書陳
亡而具五國援夫子存周之義以具五國皇極所以溥

建而斯文不喪也確菴子繼銅川之志歌伐木之章茅
簷土堦講道勸義固將以贊易為司命元經為賞罰六
經七制之能事研之深講之熟矣苞塞演迤作為詞章
本天咫揆人紀蓋莫不有畏天悲人自古存者之思為
文中子論永嘉皇始之事曰我聞有命未敢以告人則
猶傷之者也傷之者懷之也確庵子之文其傷與懷之
交乎文乎文乎思之所以泣然而嘆也嗟夫茲之摘華

金序二
揆藻游光揚聲者亦多矣日及之花非不鮮妍也風前
之燈非不呈耀也本之則無如之何確庵子居今之世
抱遺經以道古昔志勤言微其道大備後百餘年人將
以婁江一水為疎屬之南汾水之曲然後知余言之不
徒也老夫亦何異之子振頽綱敢竊取薛內史之詞以
為確庵子贈歲在屠維大淵獻余月二十一日虞山蒙叟
錢謙益謹序



序

余牧婁六年婁固人文淵藪若挹水於河
而取火於燧也得把臂其林幸甚而獨心
儀言夏先生言夏明之孝廉也學富鄉鄰
才優經濟俾出而用世寧不足康濟方寓
而會際鼎革輒埋名肥遯不上公車顧其

人物自好式金式玉絕無庸隅圭角之
迹蕭然蓬華時往來于虞山婁江間訓諸
及門以淑人為任其毫心良苦秉志良確
而由夷自遠併不見其岸騷佻條之氣所
稱有道君子非耶我

清微山林隱逸之士檄下觀邑余特舉先生

應辟先生咲而不就興到則策杖而至索
之則不可得余嘗與友人揚榷時彥又首
誣指先生其出處似陶靖節其行已似郭
有道其文詞似魯子固又人咸以為然一
日先生出其文稿數十篇示余余展繹再
四大約詞簡而潔法正而嚴義精而核借

他人之品題據自己之經濟與世之摘華
闢彩以為名高者不可同日語固家丞之
秋實地庶子之嘉華也有德者必有言先
生之文乎至與映碧李廷尉一書其勸勉
逢尉者皆其所自道也余幸獲交於先生
先生亦不棄余以為學罪於斯王余禱先

生之文益心儀先生故不揣弁言以風世
焉

戊戌冬月三韓社弟白登明題步

素風軒中



安道先生小傳

先生姓陳氏諱瑚字言夏號確菴太倉州人莊介先生子也幼竒敏孝讓長而任道統闢異端旁通律曆兵農之學遠近名流皆相就從遊者以千計小試輒冠軍食餼廩崇禎壬午舉於鄉甲申後居崑山之蔚村力耕養親著書自娛村固低洼所築堤

禦水石田悉成沃壤又嘗捐貲賑飢立條約致鄉之人無菜色無倍德建議開婁江六府沾其利歿載史志祀入鄉賢門人私謚安道先生蓋先生有濟世才而以理學氣節文章名海內其理學尤足重云年通家眷姪王吉武頓首拜撰



徐 鈞 王祈鞏 侯開國 薛 熙

門人翁叔元 顧 湄 王 攄 葉 淳較閱
蔣扶暉 孫致瀾 楊 崙 毛 辰

確菴文集總目

卷之一

詩 頑潭集

卷之二

詩 隱湖集

卷之三上

詩 玉山集

卷之三下

詩 婁江集

卷之四上

詩 婁江集

卷之四下

詩 鄧尉集

卷之五上

詩 淮南集

卷之五下

詩 楚江集

卷之六上

詩 蟻橋集

卷之六下

詩 破山集

卷之七上

詩

卷之八下

詩 後蟻橋集

卷之九

詩 東野集

卷之十上

詩 紫陽集

卷之十下

詩 雙鳳集

卷之十一

詩餘 未刻

卷之十二

序 共五十二首未刻六首

卷之十三

序 共四十五首未刻五首

卷之十四 序 共五十一首未刻一十四首

卷之十五 記 共二十三首未刻四首

卷之十六 傳 共二十一首未刻六首

卷之十七 生傳 共二首未刻

卷之十八 行狀 共二首未刻

卷之十九 墓銘

卷之二十 贊 共四十二首未刻三十九首

卷之二十一 題跋 共七十一首未刻六十二首

卷之二十二 書 共五首未刻一首

小劄 共七十八首未刻

卷之二十三 說 共十一首未刻四首

雜文 共二十首未刻九首

卷之二十四 聖學入門書

卷之二十五 講學全規 未刻

蓮社約法 未刻

蔚村講規 未刻

卷之二十六

淮雲問答

未刻

講義

共八首未刻一首

卷之二十七

條教

未刻

卷之二十八

條議

共一十三條未刻一十條

卷之二十九

開江書

未刻

卷之三十

築堤書

未刻

卷之三十一

治綱

未刻

卷之三十二

附記

典禮會通

未刻

天文書

未刻

卷之三十三

日記

原名經義錄 未刻

卷之三十四

日記

原名治事錄 未刻

卷之三十五

日記

未刻

卷之三十六

日記

未刻

卷之三十七

日記

未刻

卷之三十八

日記

未刻

卷之三十九

日記 未刻

卷之四十

日記 未刻

細目嗣刻

男陳陸輿以載孫

溥乾如 編次
潛晉夫

確庵文集

卷之一
詩歌

頑潭集 起丙戌盡己丑八月

無悶謠 有引

丙戌春予避地任陽區自號無悶道人所居矮屋四楹茅茨不蔽爨舍卧床之外虛其二楹以聽風雨地偏人遠理亂不聞任永之失明杜微之矐閉庶幾近之時以國郵家憂廢詩不作而即事觸心有不能已者乃作謠辭以寄意焉

我有敝廬不蔽風雨容膝易安寧懷故宇我有破衲敗絮其中紉箴補綴可以禦冬我有小瓢空空自守且以酌水且以飲酒我有短床足不能直鷄鳴而起嚮晦而息嗚呼何乾何坤何旦何暮何醉何醒何寐何寤吾目其矐吾耳其聾生乎吾始死乎吾終

瓦枕吟

維高士之石兮吾病其硜硜而忤俗維昔人之木兮吾慮其展轉而反覆

維此物之胚胎兮固水火之具足庶以此而死全兮聊寤歌而獨宿

懷黃冠蔡伯仁余乙酉避地主人也

啼鳥三匝欲何之記得當年借一枝張儉東萊亡命日朱家關內置奴時
愠愉情性窮途見任俠肝腸亂世知回首白茆江上月秋風今夜正淒其

除夕

抱影寒潭悵索居驚心駒隙有乘除鄉人祭賽違新臘社老衣冠見古初
夜聽風聲生怖畏朝看雲影悟空虛棲遲晚晚拚霜鬢土室袁閔可得如

丁亥春日奉懷湯惕菴座主

一別愁如雨天南苦戰爭衣冠存一宵風雪靜蠻營千古君臣義三年師

弟情及時崇令德爭敢負平生吾師于同門中器瑚見則必以道德文

于也亂後久不通問近有人述師在每向友人稱道瑚曰言夏真君心苦調今世所少因作此詩懷之并以自勵云

鳳里友人訪予蔚村阻水不得入悵然而去

風雪填門不記年足音空谷又徒然津迷隔斷漁人路興盡紆迴好客船
滿耳蛙鳴春社雨一溪霞散夕陽天北窻支義莫笑陶家愛醉眠

中夜嘆

蘆中人真義上眉間尺真孝子嗟哉古人其逝矣嗟哉古人其逝矣中夜
思之涕如雨

種秫

蕭蕭無髮並無家芟製荷衣度歲華十畝晚禾都種秫一池春水獨澆花
迎風燕羽飛還墮帶月蛙聲靜復譁回首故園雲萬疊夢魂和淚落天涯

對酒述懷座客有泣下者

南冠相對不勝悲甚矣吾衰髮欲絲海角颶風天有恨舟師曠焉江頭
潮信地無知潮不至破愁酒擬沽千日避俗歌將續五噫何處尚餘之淨
土此生應與首陽期

還金詩有序

學莫先於義利之辨義利弗明苟富貴必以賄敗窮則沮然易
喪其所守此見金忘躬利乃不利也戊亥之交予避居周市東
偏瀕新塘塘之南有鄰人徐者拾白鏹五十金越三日歸其主

人封識宛然里人詫爲異聞吾友茂先鼎父惠父輩相與歡欣而贊嘆之萼青又爲之傳其事予亦欲作文以志之而所欲言者已盡於萼青之文乃止既而思之昔伊尹耕於莘野而樂堯舜之道非其義者雖千駟萬鍾弗顧雖一介毋取與予今其能乎未能也然則予之有愧於若人也亦已多矣遂援筆而爲之詩其辭曰

人生大塊間如魚响水中果腹便有餘何勞致求豐鄙人聞此理皇皇亂其衷臨財多苟得見金或忘躬比聞草茅下高義一老農家鮮儋石儲而乃能固窮拾遺償厥主慷慨無恡容廉恥興人心不謀自辭同在昔生民初含真守恹恹迨來老死絕予奪兩無庸淳薄一殊源巧僞羣相攻安得盡若人重覩羲皇風

苦雨

平野綠初翦小山青未明風雷兼曉夜町疇失縱橫鼠見銜羣跡鳩聞逐婦聲片雲又垂黑何日破愁城

讀易示自茸城

我生丁百罹厄運在陽九天地何不仁萬物如芻狗愧無神龍德不敢見其首遣興數行詩陶情一杯酒上有白頭翁此身肯許友需泥倘致戎徒爲丈夫醜三復括囊辭庶幾靜無咎

漁父辭

漁潭七十二漁父性踽踽茅茨小結廬曾不蔽風雨遠峰在南窓衆卉當門戶漁父既忘世世亦忘漁父祖身捕魚蝦泥水沒雙股呼婦煖濁酒中夜獨起舞仰占天漢星零落不成伍援琴一再彈悲風動環堵

郎玄翊挽歌

客遊璜涇里揮涕思故人故人具壯志龍性誰能馴倉皇避兵燹逃竄居海濱海濱人何愚處堂日嬉嬉飲酒兼六博相與共歡娛朔風日以競殺氣日以盛蹠血到雞狗尚乃傲天幸吾友明且賢苦爲衆論牽一朝喪頭顱含怨歸黃泉聞君遇敵至生死視如寄初未乞哀憐但有怒且詈此乃古人義所惜僅小試親兮不得養女兮未昏嫁篋中舊詩文半與物俱化

風爲蕭蕭悲雨爲盈盈下風雨有時窮長恨何年罷我來不見君燐火光
成群泣君君弗知呼君君弗聞爲君作挽歌辭竭傷心多死者今已矣生
者將如何

插田歌

西天月初落東天日未生鷄鳴喚女奴洗鍋燒肉羹忽見東方白旋見
東方紅穉子入烟霧小船刺隣翁解隣翁到門來相呼不相揖雖非風雨
天仍然具簞笠解荷耒齊下田結束一何慎下田如下操排布花門陣網
鳴鏡知飯熟大家飽其腹飯已立斯須好風來樹木飮插田苦日熱炙人
背水熱爛人股解插田苦可奈何不唱跋遮曲但唱吳江歌解唱歌入人
耳唱歌動人情貪唱吳江歌種秫錯種稭解種秫錯種稭捕魚誤捕蛙腰
酒人一壺雙眼都生花解一日六七餐膏理無華色對酒不能御舉肉不
能食解柳榆周后稷懊惱神農氏毒詈秦始皇偏不廢耒耜解一日沒歸
西山結伴相與還還又何曾閒解二力田能勝貧謹身能勝甌古人不我
欺微言起悟者解三

蓮社招隱詩

蔚村有七十二潭潭皆種蓮花思與友人共樂之而作是詩
日月易化遷晶晶成炎夏茅簷雨乍晴潭水波微瀉心跡雙悠然繫艇笑
蓉下青青綠葉浮淡淡香風寫此樂敢白私願爲古蓮社其中有妙善所
與能同者

五月十四夜

揮手登舟去不還不將離別動愁顏羞同張儉投門惡漫學稽康鼓瑟閒

孤桐吟

龍門有孤桐崇幹干天日上有鳳凰鳴離離吐朱實桐生何不時斤斧賊
其質拉雜摧燒之乃與衆卉匹哀哉無蔡邕留此斲琴瑟

神龍吟

神龍躍深淵變化不一方大乃風雨怒細能爪指藏未免具所欲畜牧如
馴羊一日烹醢食行道爲悽傷是以至人心澹然天地忘

黃雀吟

啾啾三黃雀依依朱鳳旁朱鳳既威垂黃雀亦翱翔二雀游北渚一雀巢南岡飲啄與羈栖各在天一方一雀飛飛中毒矢二雀哀哀欲同死

猛虎吟

猛虎逐深林風伯甘前驅偶爾嬰係蹄遂乃絕躡趨豈寶環寸踏以傷七尺軀萬物理良近爲我生嗟吁

次韻答陳義扶同年

蒙頭咄咄問天行病骨輕於江上萍雨入寒砧秋樹落風吹殘角夜潮生難聲空作無端舞雁足難傳不盡情何日月明相對飲荷花深處一舟橫

翩翩者羽五章一章六句一章四句二章十句報龔與參

翩翩者羽辰於中路棟宇顛覆巢將焉附豈不懷新終不如故剪剪其菲采采其藹十畝之間賦足胼手既食而粟亦孔之醜上戀白頭下牽黃口任運無心叩師五柳

有琴在堂有酒在觴有書在床可以豫康今我不樂日月無良

酒既醉矣琴既闕矣憂從中來不可治矣

有美一人采桑東阿首垂火齊身佩鳴珂吹氣成蘭吐辭欲波來我好音
易我微和道阻且遠我勞如何

讀史四首

坤維限中表大化殊尊卑此乃天道然亘古恒如斯舒蓼一以滅春秋有餘咨負乘寇之招暮夜思奪之機槍自此始衽席知何時雄龍耳翕張雌龍尾垂垂二龍今不至誰爲辨雄雌

白起破長平邯鄲亦垂斃救兵如拯溺晉鄙何遲滯魏客辛衍來公子慙無計時無魯仲連秦已尊爲帝卓哉蹈海節杰然萬夫勢千金笑不納功成遂長逝

項籍旣嗾滅田橫懼爲俘逃入海島間從者五百徒漢王強相召殺身在中途不惜亡虜苦所惜南而孤三客遂從之衆客與之俱一死頗傷勇三綱賴此扶

炎火丁中葉新莽居奇貨一時頌周公上書相煽和梅福棄妻遁逢萌挂冠卧陳咸斂書帙薛方守窮餓鵬飛旣寥廓羅者不得下白水真人興百

祿遂重荷南宮繪圖像聲名永遐播不聞隱鳳徒終作從龍佐

采蓮詞潭中留客

芙蓉今夜爲誰開繫纜花叢汎綠醅縱飲莫愁壺裏盡小舟蕩槳又沽來

登山詞

登山莫太險涉水莫太深山險股必栗水深身必沈股栗尚可身沈殺我前人失脚後人把滑

讀陸道威八陣發明寄贈

吾聞龐德公寄跡鹿門野卧龍每從之隕然拜床下床下何如人况乃床上者肯無三顧勤没齒同喑啞身隱焉用文此言信非假

五歌

古人歌以言志屈原九之杜甫七之今予僅得五焉音愈促心

愈哀矣

有客有客在他鄉秋風淅淅吹衣裳陶瓶呂桶虛無藏一朝饑餓凍且僵東西南北魂翱翔床前月兮地上霜援琴鼓兮來淒涼懷美人兮何時忘

嗚呼一歌兮歌已悲雪庵樵叟知爲誰

有親有親在東臯硯田託跡心忉忉種瓜一畝生蓬蒿髮禿短雜二毛肌膚瘡痍何人搔我呼天兮長叫號杯有酒兮蟹有螯老人樂兮母劬勞嗚呼二歌兮歌轉痛愁烏爲我啼歸夢

有子有子癡復癡大者不肯勤書詩小者索飯啼門楣尚有孩幼襁褓持寄食他氏爲人兒治善裘兮弓善箕泉有醴兮艸有芝何必強兮從所宜嗚呼三歌兮歌草草陶家有詩掛懷抱

有弟有弟在城北居無田廬食無肉結束縹緗罷不讀世情波瀾同反覆何時出幽遷喬木伯爲手兮仲爲足家積善兮天降福擇所交兮慎爾獨嗚呼四歌兮歌黯黯長枕大被無人眠

有婦有婦手摻摻紉箴衣袂無寸縑糟糠蔬水常相兼日不再火突不黔飛蓬井曰愁心添樵有薪兮織有簾黍離離兮麥漸漸終吾生兮同藜藿嗚呼五歌兮聲氣極白日爲我寒無色

桂村訪陸仲威

小閣虛窗立釣灘春蔬臘醞盡君歡魚吞花影吹波細燕啄泥香入幕寒
秦地桃源閒歲月漢家粉社舊衣冠莫嫌任永偏忘世時事而今不忍看
仲威
失明

村居

蘆白楓丹炤綠蘋粘天波浪自粼粼愁知日月催雙鬢貧覺妻孥絆一身
詩卷行吟書甲子薰爐匡坐守庚申南山當戶悠然見相對年年似故人

除夕尉遲廟迎神送神曲五章

朔風吹兮當戶霧霏霏兮如雨呼童子兮伐鼓神之來兮不怒
陰陽爭兮龍鬪死道之窮兮土不制水渺渺兮寒波村不烟兮無示神將
愁兮奈何

捧桂酒兮盈卮潔吾心兮致辭齊萬物兮淵沌神不樂兮何爲
神首肯兮心炤遂破涕兮爲笑嘗余肉兮一鬻醉予酒兮大醕
忽禔禔兮欲歸翔空空兮靈衣知不可乎流連嗟窮獨兮誰依

戊子元旦

積霧沈雲晝不開溪流續續到門迴芙蓉衣製先民服楫柁爐煨昨夜灰
凝碧年年摩詰恨曲江歲歲少陵哀多情幸有梅花在轉眼春風徧八垓

寒溪八咏爲盛聖傳賦

出門星在天入門鳥歸樹羣動同一勤當此有心悟閱畊

開雲以爲餌野月以爲鈎嚴陵較慚媿多却一羊裘垂釣

弓子非似竹竹乃似君子六月清風生科頭讀心史倚竹

君道不如鳥春來啼更好鳥道不如君天機獨了了聽鳥

夜雨一畦綠春風三徑香臨溪笑陳仲空爲別人忙灌蔬

故人雙屐來清言霏玉屑一夜明燈中唾壺已擊缺語雨

月華凌太虚心蹟非人境徐咏陶潛詩揮杯勸孤影對月

空白渺無際風搖天地寒主人抱微尚不付啓扉看眺雪

丘文眉行脚詩

山哀浦泣動離歌無計維駒奈若何赤脚那能縮地脈壯心空欲挽天河
楚關橐載催頭白蜀道鞋行濺血多烟岸一尊春耐綠龍鐘雙袖入烟波

予別號確庵今擬改借庵放筆大笑

借田鋤種借椽居几榻琴書借滿廬借得此身仍長物半同老衲半樵漁

梅花將盡寄所遲客

昨夜梅花光照門紛紛如雪又如雲春風無盡相思意只怨梅花不待君

信顧磨士盜警兼讀織簾居詩卷

二氣混茫萬物錯梁有禿鷲林有鶴古之盜賊畏仲弓今遇仲弓色不怍古之盜賊畏彥方今遇彥方探其囊一身以外皆長物人情當此恒旁皇先生養氣得其裏我心不動只如此揖讓從容整且暇揮却青瑣似糠粃篋中舊著詩三百擲地琅琅作金石笑語群盜勿毀傷此吾至寶君不識幸得留來遺野人披卷樸素傳幽真雖然未必篇篇酒也應還是義熙民

附磨士和作

此生未死百事錯燒煮何嫌到琴鶴舉世從知付倒顛赤丸不怍青瑣怍我昔交遊滿四方一貧固守惟空囊冬寒月黑有底急坐煩豪客來張皇膾肝塗腦紛紛裹白日黃塵亦如此數口飢寒豈足云一身之內

猶糠粃嗟哉生年誰滿百安用兒孫傳磐石孟生破甑去不顧北意却待林宗識武陵聞有避秦人吾亦前身黃道真尚擬鳩寺買村酒桃花深處訪遺民

得劉映薇先生殉難成都消息

十年游宦著能聲萬里孤忠不為名我亦辱稱門下士心喪三月哭先生蔚村八勝詩同石隱寒溪桴亭作有序

蔚村在崑城東北三十里地遠而僻水道紆折無鄉導則不得入焉相傳為有唐鄂公尉遲敬德躬耕處陳頑潭即其故宅趾潭之陽有鄂公祠土人奉為社以祈風雨賽禱每著靈異土風儉陋薦僅蔬菜予至易以血食更謀鼎新之祠前雙柚樹作門祠下有井甃磚為苔蘚所蝕蒼碧粼粼井中有神薨一時浮沉水間人欲取卒隱不可得村山脩廣千畝窪而頗腴作隄四圍之水旱蓄泄是賴內為潭七十二悉種荷花而陳頑潭為之長其大浜則村潭之不稅者故土人不種荷公取魚蝦之利秋夜

玩月於此爲勝祠北爲龍窟嘴曾有白龍於中飛去故名更北
爲郭母澗郭母不知何時人也亦不詳其事跡地以人著大抵
亦賢婦人云楊氏宅卽今予所遜跡讀書處也嘉靖中倭寇海
上鳳里周公錫避兵居此宅周爲名賢士人謂此宅前後居停
隱者亦宅相之善戊子四月石隱桴亭寒谿見訪欵留信宿賦
詩贈別雷雨猝至吟興未已因指蔚村八勝每題各賦五言一
絕頃刻而成或稍後者浮以大白時案上止一筆相傳疾書文
不加點八又七步未足喻其捷也惜藥園不與此會石隱命之
補詩越一月中庵見示和作并附錄焉

太湖八九峰蔚村八九潭高深雖異致各自有奇探七十二潭

鄂公本英雄胡爲不血食我來荐鷄豚洋洋如有卽蔚進廟

何年一古甕寒泉微見影天地悲化遷改邑不改井古井

但傳楊氏宅不見草玄亭幸得同心者時來共醉醒楊氏宅

本爲下瀝田築隄作防護却使問津人周遭失歸路四堰

雲從龍已去波浪尚千重未許詩人笑終身作卧龍龍窟嘴

曾記入村初停橈郭母澗主人歡出迎呼婦餉雞酒郭母澗

寒冬十二月水淺露微沙漁翁百艇橫袒臂爭魚鰕大浜

附石隱作

澄潭七十二潭潭種荷花摘子當饌糧采葉裁袈裟七十二潭

當年奪槩人居然事草野宏勳著唐室英風赫吳社尉進廟

古甕碧粼粼寒泉冽於玉社散飲此井一滴受百福古井

昔日避兵人今日蓮社長兩賢去百年土人稱宅相楊氏宅

水漲四堰平水落四堰出村農百餘家於焉長稼穡四堰

一泓清澈底纖鱗亦能辨要知龍潛處不在水深淺龍窟嘴

郭母一婦人猶能重其澗君子當自樹千秋志不朽郭母澗

水面平于鏡微風靜蘋末長者不種蓮留以貯明月大浜

附寒溪作

荷潭七十二向夜有餘清月光與水色薄古只同情七十二潭

讀書見高義拜祠識精英鄂國曾分土何時此退耕尉遲廟

村中有古井淵然神祠下泉水一何甘籍以飲畊者古井

此宅百年餘兵燹未嘗厄但願天下安盡如楊氏宅楊氏宅

水村却畏水築堰郭狂瀾夜深風雨急不住往來看四堰

龍去已存窟游魚尚不馴至今千尺水逆逆見金鱗龍窟紫

郭母何如人彷彿有高致溪水日夜流令名稱不置郭母

水面大于天無溪可泊船偶來閒蕩漾薄暮起寒烟大洪

附桴亭作

何處放舟好紅蓮四面開澄潭七十二處處看花來七十二潭

鄂公千載豪未必辨稼穡固知山林趣英雄所共得尉遲廟

村中好溪水不識井泉香宋寬古祠下夜夜發神光古井

昔賢避兵處今日成古跡遙知千載後高風更踰昔楊氏宅

村中多水田遠听作隄捍春水白浮天村流只半听四堰

白龍已飛去尚餘龍窟紫惟有臥龍人時來酌溪水龍窟紫

但聞郭母名不聞郭母事溪頭流水聲彷彿猶古意郭母渡

儂家大洪南種田大洪北飯熟放船去遥遥未能即大洪

附藥園作

大潭日月舉小潭雲物翻長風撼林木野水嚙天根七十二潭

鄂祠荒烟裏雙雙樹作門風來葉聲戰疑是神靈言尉遲廟

神瓷或浮沉恍忽著靈異年登神兮喜井上小遊戲古井

宅豈能重人人自能重宅今賢與昔賢高名懸白日楊氏宅

都來一掬土屹如百雉城高城已摧壞此中未受兵四堰

龍潛伏勺水龍怒鼓百霆試看龍窟上雲氣水嘗腥龍窟紫

村中潭八九雖多亦何有何處揖清風陳頑與郭母郭母渡

拏舟入東堰遥遥水勢寬白露兼葭中碩人賦考槃大洪

附中庵作

五日遊一潭一年潭一遍何處藕花多惟應鷺鷥見七十二潭

當年第一功曾賜吳公履廟食擬桐鄉魂乎猶戀此尉遲廟

脩綆待晨爨徘徊不敢汲爲有夜浮光神窈井中出古井

一望蒹葭曲高人卧白雲空傳草玄宅不著美新文楊氏宅

堰東復堰西堰南還堰北而面斷船行何憂逢俗客四堰

龍來窟紫平龍去窟紫露低田久無食願龍不更怒龍窟紫

作婦未必惡作男未必賢君看郭母淒非因郭父傳郭母淒

我行尋蔚洲先及大浜裏不知隱者心共指浜之水大浜

乙酉九月劉河所郭純一婦朱蹈海死友人張元樸簡予曰此婦

人中魯仲連也因爲之歌歌曰

於乎魯仲連蹈海不帝秦高義千古傳哀哉古今人相去何天淵况乃一

女子生死如浮烟獨有郭婦朱矢節以自全時當乙酉之九月殺人

東海邊玉帛載馬後子女羅馬前忍辱圖苟活行道皆哀憐朱乃從容蹈

東海仰天含笑歸黃泉有女義不顧有夫情不牽江南丈夫幾百萬此舉

偏讓婦人先吁嗟乎婦人之中魯仲連

閏月三日偕陸鴻逸攜花載酒訪瀾漕友人歸舟遇雨鼓柁而歌

夾岸菰蒲起棹謳夜添新漲足溪流攜尊求友心先醉感物成吟調入秋

漁網家家懸屋角野花片片撲人頭倚舷高卧分簑笠細雨霑衣更不愁

贈白庵生日次韻

芙蓉衣帔籜皮冠日日青絲白玉盤酒向春風常作主人如秋月不禁寒

花間坐隱拋碁局溪畔行吟弄釣竿底事夜分還不寐鵝群書法剪燈看

夏四月新安程士起夜過予述鄉井之亂鬱鬱不得歸爲予鼓琴

涼一曲予爲作絕句以序其離愁怨思之情

程生書記故翩翩爲客於今二十年俠骨旋癯頭旋白囊中不掛一文錢

江湖離亂幾時還家在黃山白嶽間一曲土風操未畢泪痕如綫墮潛潛

消息天涯不可聞良家子弟半從軍仲宣怡向樓頭望紅樹青山見白雲

風吹鶉結袖編爛縫密頓思慈母顏夢裏分明經越水覺來依舊住吳山

訪江俊求口占二首

燈火茆齋對讀書回頭已是十年餘相逢不用寒暄話招我前溪看打魚

家住蓮花深水灣隨風偶爾到人間輕舟載得故人酒趁此月明連夜還

破山瓔珞樹歌

破山之麓興福寺庭雙珠樹狀如瓔珞抱佳趣上有虬幹千青雲下有垂
條蒼蒼拂行路傳聞植自齊梁間龍山北礪詩未刪名賢新聲更聞起野
人對此怡心顏茲樹篤生有妙理左兮開花右結子山鳥不敢巢其顛猿
猱鼯鼠不能穴其裏豈曰碩果宜留存天地亦若爲爾培靈根我欲斬其
根披其枝當風拉雜摧燒之樹若有靈聽我前致詞泰山山頭千丈松只
今已受秦官封斧斤柯石遍海內爾樹安得仍以不材終君不見七星壇
前七株檜昭明手澤今何在又不見三峰數仞丹桂花可憐剗削無萌芽
萬物成毀固有數生無罣礙死無怖爾住四高僧前千百年聞吾此言當
恍然

責子

家世本南渡隱德代可數遺傳守一經素風自清舉大人秉剛方言動必
稽古父道更兼師訓予繩祖武強勉頗有年稍稍振其羽如何丁百罹時
事多齟齬竄跡各東西父子不相覩天地大罪人甘同草木腐肯構與肯

堂責望將在汝汝輩復不才永絕高曾矩中夜昧昧思涕淚零如雨

村中大水李萼青以四絕句見訊蓮花次韵解嘲

舍南舍北水平分携杖檐頭看白雲遙望前村樹深處每隨風雨欲呼君
日日尋花花未分閒心一點亂如雲蓮花還是無情物歲歲相思不及君
蛙黽填廬閣夜分窓中波浪似層雲經旬抱膝床頭坐君入村來愁殺君
綠葉紅蓮兩不分池塘倒映一天雲花開疑向深潭下捉月探花還待君
饑

愁殺池塘兩部蛙誰家烟火望中斜床頭夜盡柴桑粟雨後朝嘗顧渚茶
酒飽三蕉身似夢豁呼酒醉琴彈七日眼生花西山亦是周人蕨閒較前
賢却自誇

蓮花行

蔚洲村中潭八九問子潭中何所有潭亦無所有但有儵鱗能下酒潭亦
無所有但有蓮花大如斗去年潭水深儵鱗出沒不可尋今年潭水深蓮
花憔悴傷余心此花胡爲以藕名花花葉葉常並生月長一節應氣候直

與天地相流行又能磨然出秋水骨幹正直中通理絢爛之極返太真所以古人比君子豈其君子亦有窮須臾翻覆波濤中爛死沙泥不得起七十二潭潭潭同野人素抱濂溪癖思與此花共晨夕花應怨我來何遲不見當年全盛日我願花兮堅自存但傷枝葉勿傷根來朝水淺風波息依舊開花滿蔚邨

陸桴亭見贈陶巾

王子新裁處士敕礪風流約略似柴桑濯纓好覓滄浪水稱服憑添碎荔裳襲美寄來詩作報山公游處俗為狂醉餘只恐隨風去露頂人前髮未長

擬邀文介石先生住尉遲廟

寒風獵獵送斜暉雪滿頭臚淚滿衣六詔山川歸夢遠三湘烽火客程非吟殘丹葉空留恨讀遍青烏未療饑我有寒潭依古廟不妨老此竟忘歸荒村連雨用皮陸秋懷三十韻寫愁寄二三知己

死秋日日雨荷笠眺荒郊潭動疑龍窟林低羨鳥巢蘆花搖蚱蟻桑樹落

蝶蛸戶駭金戈至窓驚鐵騎敲蛛羅張枕畔蛙吹鬧庭顛荷綠全無盡而青不見梢雷垂如倒馬墻壞侶鳴髀漁具慵歌咏農經倦錄抄斃腸貧水濯短髮帶泥抓劔鏞花侵室鞭懸爛及鞘求薪撐板筏乞火繫壺匏羯鼓聲音咽絲桐韻響膠朝朝塵甑釜夜夜冷厨庖元亮窺瓶粟坡仙憶網看呼天次土簫祈社擊神鏡候月看箕畢占晴問卦爻白頭揮涕淚黃口雜喧堯靖莫傾瓢戲巴胡喫酒嘲場頭爪折項床下菌蒸胞有鶴常鳴埵無魚不利包商羊欣跳舞黑蜮恣咆哮殷后思遷耿周王欲避喙災同甲子烈田亦戊申拋萬曆三十六年天震澤波難定婁江勢漸交賈生悲死濕屈子卜誅茅天地頻翻覆陰陽若溷淆愁心山鬼伴詩骨病魔穰謫劣慚樗櫟迂庸嘆斗筭句憑宗匠削理向大賢教應笑無高論浮沉任一飽

蝸牛書舍詩

三月大水室無容膝乃携琴書偕兒徒葦放棹中流隨意所適潭影空映荷氣襲人漁歌鳥語之中琴聲書響絡繹間起徹于田畔遂日以為常殆古人所謂泛宅者歟因自號其舟曰蝸牛

書舍觸景會心率然成詠

誤道銀河泛客槎小舸一葉當浮家魚忘人影閒相狎蛙愛書聲靜不譁
微雨清朝依柳陰香風亭午坐蓮花兒童長日真如歲日斷前村起暮鴉
鳳里顧鄂生嗣子振少年奇孝受先傳之子常贊之中庵天御又
詩之其不朽可知矣戊子春鄂生請予一言予曰唯唯雖然有諸
公作在可母贅也夏遇鄂生于直水又謂予曰吾子尚年少氣質
未定與君一言俾相勉為善人不亦可乎斯言也鄂生真長者哉
子也孝子父也賢父矣遂直陳其事而為之辭

天道可必乎仁者必有壽天道可必乎仁者或無後無後而有後天道仍
不苟善人顧鄂生幾作鄧家叟猶子承宗祧名振字子厚是時志學年奇
孝天所授鄂生病且劇引刀腹可剖倉皇不得肝遂乃刳其肘血性通神
明病者終无咎縷縷痕如絲見者欲驚走至誠挺奇行豈曰出矯揉鄂生
真有兒傳遍里人口刺史表其間邑乘垂諸久顧華有名篇此事定不朽
傷哉教化夷風俗日彌醜誰念餅之罄負耻及囁舌德色父借鋤諄語母

取帚還問通都中有此獨行否且喜鄂生意退讓不敢有吾子尚冲齡未
能保厥后願得君一言藉以堅素守此言更有道舉筆殊自忸遙贈直質
詞臨風一拜手

八月刈早稻

飲食取充腹求者何皇皇學稼未逢年餒也固其常閉關爪牛廬烟火微
通光八月秋正中早稻裁登場力田二畝半納稼不滿箱晨炊薦社公宵
春餉高堂尊親畢所願乃同兒女嘗知足便自足大烹非所望

舊錢

人心興廢總關天太府無煩制貨泉蝦菜木村船作市家家仍賣五銖錢
生女歌戲慰蔓菁

山荏苒寇疆場木蘭為父持矛戟又不見淳于犯法當加刑緹縈上書感
朝廷有女爰急苟如此不讓鬚眉丈夫子詩人之辭迂以拙男女生來強
差別寢床寢地上下殊弄璋弄瓦尊卑絕若還桓家無女郎安得乘龍李

與黃若還却家無女郎安得右軍坦東床何況里人口花前而子後桃李
謝春榮蒼松啓夕秀商瞿四十尚無嗣後來乃得五男兒君比商瞿尚年
少瓜瓞綿綿正有期勸君且盡一杯酒何必爲此長嗟咨

贈黃奉倩

斷壺圖畫意偏長擊木悲歌未是狂醉後偶然多筆墨但書正月不
題與參晚翠庵

閱盡人情萬事慵靜中詩卷日從容慣迎賓客花間犬粗識君臣架上蜂
釣雨及辰荷作蓋著書經歲筆爲農庵題晚翠何人伴恰有黃冠號澗松

棘澗羽士

秋聲

秋聲吹不寐起視正宵中窺甕愁飢鼠啼花急亂虫露含雙樹白月借一
燈紅可嘆韋端已行蹤似轉蓬

簡黃幼玉并書

承諭詩句枕上口占一絕與尊指殊不相合覽之可發一大笑

也古人云士窮見節義松柏之姿經冬不凋松桂之性至老愈
辣昔陶潛有乞食詩賈島有乞米書雖高人達士無所不可然
隘與不恭君子不由也前合甫援留時有出粟相餉之說弟固
已揆之于心久矣止而弗遷者所以申其情辭而勿受者所以
存吾義今適彼此相安何爲以詩促之哉鹿城諸君皆當今第
一流也明歲定當延致村中談心論道若有所爲而爲則非本
志矣鄙見如此仁兄以爲何如噫知我心者其幼玉歟不必令
他友見也

巳丑元夕送徐次桓之桐江三首

故人雅意獨惓惓愧我才非賈浪仙乞米無書存瘦骨祭詩有酒送殘年
管領春風酒百壺送君烟雨一村孤不知此夜桐江裡尚有羊裘釣叟無
何處當年許翺亭白雲源上白雲生憑君寄我西堂泪碎盡江頭竹石聲
西湖山上雨高峰無限離愁有夢通遙想過江風雪夜梅花一路月明中

春日

春上晴溪冰腹開山村烟景暗相催枝頭有鳥窺虛牖門外無人掃落梅
餉米一簣衝雪去市魚孤棹帶花回久知學道能忘世只恐猶添萬恨來

斯友堂詩

已丑孟陬同人集蔚村講易石隱以事不至屬予爲作斯友堂
詩客公不寐剪燭直書遂得百韵

既爲萬物靈自稟兩儀秀五性初感通遂與物欲媾衆形役一心下乃夷
禽獸此理在結繩微妙無人逗自從義皇來群聖相左右八卦書其先洪
範叙其後人極一以立萬古開迷瞶尼山老布衣厥命實不猶歌鳳悲填
膺獲麟涕橫袖刪述兼贊修神功無滲漏爲天植斯文上帝可其奏大道
曷日月燦乎如白晝弟子三千徒四海群輻輳千古一大朋心法傳薪燧
奈何微言絕大義遂乖謬羸秦并六合一火毒于寇漢儒傳糟粕經學僅
存餘司馬壤清談羯羗滿在宥南朝向風華國祚邇不祐詩賦盛三唐蒼
生何所救趙宋文明開絕學續其貽太極與西銘暗室孤燈透明道顏冉
生伊川子與復晦庵集大成奇功一原收傷哉諸儒沒儒途又雜採明興

三百年文成發其軼不免間微沙何況諸末流憶自丁丑歲吾黨相詰究
或探萬象源窮理幾天授或交戰而勝道體肥不瘦或靜嘿無言淵心如
井甃或比春風和醉德飲醇耐或捷如發機或滿如引殼或銳如輪攻或
堅如墨守禮義當干櫓詩書作甲冑班班實有徒一一符玄宿尤愛石隱
翁求賢甚於購荆關斯友堂群英日馳驟芝苓備諸籠騏驎畜諸厩方爲
吾道慶忽爾蛟龍鬪海嶽盡翻飛大厦隳結構鼎湖痛莫攀天位乃南狩
前轍既傾摧後車復顛覆時勢累卵危舉朝充耳衰蟋蟀鬪平章黃犬吠
侂胄百姓怨湯火腹誹而詛呪引領敵國兵望之如望后朔風動地起奔
去直如傲漢德重見思天命反不又非無玄永旗旋興亦旋仆披髮走荒
郊小子多僂僂破涕強爲歡枕上啼痕溜採菊傍東籬開窗見南岫魂乎
不歸來甘心伴猿狖足進惟趨起口言終誼譎耻彼馬牛尻樂此鷄鶩味
寥寥二子子歲寒鼻自舄需沙且需泥不徑并不寶碩果僅能存意者天
所設石隱閉門垣桴亭種橘柚寒溪焚衣冠藥園事耕耨餘亦雅能軍謹
身逾斥堠縱爾溷風塵君子亦何陋泰伯入荆吳周禮相習狃箕子治朝

鮮蚍俗革其舊管寧在遼東亦復陳俎豆摩刀刮乾膜揚炭慰坤皺時時
風雨中訪我荒簷雷每攜芝蘭香以逐海上臭剪韭但烹葵信宿肯停留
王君更好學覃心菘文困論道剖儒墨學古通篆籀正月春始和吹律中
太簇頑潭蓮社開講易闡復妬空谷無足音我心怒如疾遙屬堂中詩野
禽強一雉嗟予本蓬材所恃衆麻侑瀾溪多古風隱者烟雲湊克已有同
心相約共勉懋實爲痛胥溺畜艾備灼炙乃思朋友樂當爲人事首父子
所不傳兄弟所不售夫婦所不謀君臣所不覲朋友苟義合大小皆可扣
樂善誠觀摩規過非厲詬所以朋友倫實補五倫謬縞帶與紵衣相知在
邂逅雷陳膠漆堅白首同新邁生有彈冠貢死有分宅邱青青松柏心霜
雪乃逾茂良哉王君意不屑爲小就旣採鄉國瑜復攬九州琇還念一堂
中皎然別宇宙不復戀膏粱何心被文繡但願諸同儕竭力相盪激如行
必赴家如飢必春糗學問日益宏德業日益富顯晦適機宜剛柔應物候
嗚升鳳皇鳴霧散虎豹吼請以此數言永爲此堂壽

附石隱和作

擾擾黃埃中嫉此雙蛾秀戈矛森戶庭匪曰求婚媾大海潛毒龍深山
伏猛獸撫茲懷戒心詎敢輕一逗菟業罔攸懈著言銘左右仁義勉厥
躬韋弦佩前後拙稟本愚劣荒途重迷替緬我生之初賦命實不猶王
父夙清嚴冰雪滿襟袖翁少負羸疾遺業爲滲漏違俗遺世韻操弦不
能奏落魄卧江濱抱書眠白晝育甫十數齡諸艱難輻輳朝飢拾橡栗
夕爨採薪慚殫力事父兄失學又何謬薄德偶凶人鼠雀垣墉寇瓶罍
惟囂耻逼促盡飮餒幸吾舌尚存厚邀皇天宥投筆媿班超學詩慕張
祐性情稍獲舒凍餒亦曷救感憤多不平抽刀思斷脰蹙蹙事章句鐵
硯磨幾透不憚仰鑽功口誦而心復寡昧竟何益徒勞無少收玄黃戰
胸腹夢寐殊雜揉憤悱魂結鬱脩程誰啓蘇子眉山裔逸氣駛奔流
白馬雄辨才稷下未能究陸家兩兄弟英俊自天授洪詞馳青雲書法
爭肥瘦更有伯陽子靜深如古堦雞壇八拜交如日飲醇酌關弓仰飛
烏霜翎響應毅刻燭裁妙篇旗鼓鏖戰守陸郎豪雄士蘇卿乃世胄出
處各有道不得共林宿而我衰衰者冒冒復奚購離巖井市儔焉足共

馳驟慚非千里駒終不樂凡廐本欲學鳳皇寧與鷄鶩鬪爰聞有陳陸
洙泗分堂構盛江與曹王丘索同蒐狩精一尚折衷鴻秘發潛覆可以
解醉醒可以警聾衰可以佐冕旒可以蹴介冑稽顙孔孟前樽俎尸以
祝時雖切履霜上有明明后馬周羈旅臣承恩一歷僦衰年蒙不棄切
嗟已多又壬午載賓典子雋陸則卜彙征匪無日國運適倨僣巢覆鮮
完卵瀾倒無停溜魚駭或跳梁雲懶常依岫蕨薇如可食投身餌猿狖
子乃遜遐荒餘留殊誼謫雄鷄斷厥尾鸚鵡惡其味竹折不改節梅寒
香獨艷築土爲營窟穿甕作窰竇筮卦得明夷探繇鵲乳教俄看墻頭
樹累累垂綠袖農人與有秋春不廢耕耨髡首拂琴書撐眸望烽埃舉
世共胥溺誰能請固陋脩身以俟時豈云積習狂賦詩贈新知杖屨進
耆舊奕奕斯堂中宛然節俎豆少者喜眉青長者舒面皺酌酒歌鹿鳴
習禮拜中雷異地有同心一一芝蘭臭林宗隔井里星軺爲停留互鄉
或請見不爲風俗囿愚稍通一藝六書溯蒼籀確庵新樂論損益成不
簇桴亭闡大易六陰壯於茹著述紹河汾世亂又何疚群氣繇動物雉

升鼎耳辨災祥未可知占或得衆侑將見百里內名彥日夕湊孝持景
升兒豚犬亦勉懋架訓賴賢師痛處每著炙文豹在能隱神龍貴無
月明徑寸珠街沽非善售日月無終晦劍佩有佳觀兵諫非周王馬首
敢輕扣昔者揚子雲至今蒙世詬行藏真大事毫釐千里謬遇合誠有
神針芥投邂逅吾黨諸君子欽哉慎所邁逐鹿凶終張鬪鷄鷩開邱相
彼歲寒枝風雪轉芳茂後先諸從遊死生各成就火浣綴木難吉光表
瑩琇卓犖領人倫崢嶸撐宇宙不媿好男兒夙昔買絲繡嗟予困草茅
山水供枕漱荷芰製衣裳松菊備糧糗知足聊遠辱無求自稱富混俗
養天和閒情玩物候群蟲闕禱中靜聞若牛吼委形任推遷不羨安期
壽

魯國圖詩有序

歲已丑與同人爲講經社葉白泉先生聞之仿宋謝臯羽意屬
其紀綱捧夫子像與定海所摹魯國圖見遺佑以和臯羽詩瑚
樂甚爲距躍三百乃敢拜而受之蓋臯羽當德祐之後與講學

方吳諸公游遺以是圖歷四百年所先生秉鐸其地好而求之神物復還石缺字漫幾不可辨榻其本藏笥中久一旦出以相贈豈所謂天下之寶與天下共之者耶昔人好觀山水名畫謂之卧遊今得是圖每一展對如入闕里坐舞雩此其樂豈止山川草木之勝而已月朝十五日敬懸草堂瞻拜興俯一如方吳諸公以仰成先生與人為善之意因依前韻奉賡一章兼寄同社諸君子共和之將以是誇於田夫野老焉

寶物幸相共燭天光氣新恍疑龍馬象重出大河濱被髮思先隱依墻見聖人周行真好我慚愧是天民

附白泉作并序

昔謝臯羽浪跡海上摹魯國圖於定海學括婺間隱逸之士講經山中遺以是圖與夫子像對朔望肅謁國華嘗讀其詩而嘆之前者司諭是邑即詢此碑鮮知者後得一老人年八十餘矣言幼時曾見此碑半埋土礫中指其處掘得之已深數尺為立堂廡間復

還舊觀摹其本藏笥中久矣確庵陳子今之古人也講學瀾溪之上從遊者眾乃仿臯羽意以是圖歸之

舊傳蹟不朽寤嘆覲彌新席煖或梓里桴安即海濱龍蛇潛大道鳥獸閱斯人異代同懷日規趨古逸民

和陸辛庵蔚村夜話時辛庵避公車不上

一篙溪水漲春潮喜有龜蒙破寂寥書卷明燈聽急雨酒杯短劍照深宵髮長白似三千丈蔬短青無十二條君是北溟魚化鳥不能飛去伴鸕鷀

聞雷

洊雷夜夜撼衡茆慚愧媮生食土毛學易未能稱寡過祇將脩省答天高和辛庵寒食二絕句

厨烟寂莫斷晨炊非為當年義士悲嬾向鄰家乞新火對君酌水漫題詩家家野哭墓田中日斷城南淚血紅馬鬣三年霜露裏紙錢若箇掛春風

陶九臯遠遊言別忽修弟子禮賦贈

久稱兄弟接杯卮牀下重修北而儀君自虛懷能問道吾慚大患好為師

四方投分宜矜慎千古傷心是亂離家在暮雲歸不得殘山剩水繫人思
悲洪都

擊鼓莫擊少卿鼓拭劍莫用南昌土蛇不成龍虎變鼠狻猊大笑天公苦
馬騰騰旂翻翻營後戶失前門矢折鏃車敗轅南昌城頭鬪饑哭傷鶴夜
夜啼人屋烏鳶公然食人肉

昌國衛

昌國衛今日屯兵昔置吏落伽山昔時佛國今虎關虎關崩摧無人守銀
臺金闕夫何有木石勞勞精衛心一朝風雨三光沈三光沈六龍去龍子
龍孫在何處夜潮排盪鯨人淚

命大兒操舟過鹽鐵塘

曾向湖干學弄船水嬉噴汝五年前而今孑孑孤蓬裏翻喜臨風搖曳便
伊人侍中庵先生贄見次韵贈答

蝸廬問字詎能堪喜子將車過草庵綠樹曉濃黃鳥外青山晴亞白雲南
吟風弄月詩心細剪韭烹葵酒政耐徙倚衡門送君去過溪忘却笑聲三

附伊人原韻

避世無如此地堪白雲深處水迴庵教遵鹿洞垂高範學擬龍門示指
南溪漲魚兒波競躍窓留草色翠微酣暮春侍坐春風裏敢謂區區獨
異三

中庵和前韻見贈又次韻奉酬

老雨狂風病不堪忽聞長者叩茆庵冠裳先進存三代著述功臣在二南
劉向老教青火泣陶潛飢爲白衣酣相期皓首崇明德敢負人生俯仰三
附中庵原贈

簞瓢何處樂猶堪村繞澄潭捧一庵依斗正瞻文在北邙流還識道歸
南詩將陶寫非關癖酒欲淹留不重酣慚愧十年呼類我却期言下悟
前三

諸合甫約其宗人鼎甫惠甫莊甫月吉告祖悔過遷善感而有作
孤將忠孝續先傳誓墓文成告几筵五世衣冠君子澤百年譜牒後人賢
門風恥與時流伍心史勤搜國事編海內只今誰舊德韋家花樹尚依然

宿顧雅儔艸堂二首

幽人住何處墨莊東復東卷簾看曉日散帙坐晴風客話烹蠶豈僧過剪
鹿葱一時借隱樂可得似梁鴻

結茅丘壑畔孝義古人家放犢依深樹尋魚背小叉花香鳥語細暮靜日
光斜秉燭無言處空庭一夜蛙

凌葯庵南園出家樂侑觴有感

騷屑江頭意未平雲璈忽奏不勝情衣冠尚見今優孟痛哭何人似海清
雨打鼓鼙遷客淚風飄絲管斷腸聲周郎且喜無煩顧費盡黃金教得成

和白庵掃徑

徑繞蓬蒿罷剪鋤就荒吾亦愛吾廬蒸藜餉婦攜新酒分火鄰家讀舊書
社散人歸疎樹外山晴鳩喚落霞餘江潭風景年年轉又見榴花照眼初
同人攜酒過白庵草堂和白庵韻

每遇交知興欲高不煩折簡枉相招遮門犬立迎藜杖隔水人過話板橋
書借三瓶風滿座舟移一路月生潮醉歸錯認秦人洞谷口烟深記此宵

予家潭上目擊村人日不再火乃創爲周急法惠頗不費重午前

一日年友葉媚初忽遺余粟卽公之村人書以紀之

牢落天涯甘餓死忽推仁粟到衡門爲君市義寒潭上散作春風滿蔚村
五月十三日織簾小集以周程張朱分韵得周字

織簾居中花四周織簾先生何所求梅子乍肥還帶雨竹枝初醉已含秋
白雲盡日堂前合碧水經年戶外流談罷歸來殊自得田園蕪盡不知愁
次韵東坡岐亭詩

大塊稟群生含吐陰陽汁痛癢共摩搔水火齊燥濕貴賤縱有殊靜觀皆
自得割彼以自肥母乃非所急昔稱右軍鵝又聞龜蒙鴨寄托見幽真豈
其膏鼎竊哀哉口腹人刀几淋漓赤下箸輒萬錢嗅以鼻端白膾蟹斲其
筐脯蝦脫其膾寧知湯鑊中盤旋不能泣我受孔子戒疏水或時缺我承
考亭教喫菜款嘉客養茲朴素心古風庶遙集

家人以已卯落卷糊窗用宋林景曦韵志感

雲樹腫臃日正東照來殊卷十行紅故朝封事今何在應與山窗護曉風

景儀有山憲新糊故
朝掛事詩合用其語

懷顧中菴織簾居中

結廬煙市近心遠斷聲聞香自茶靡入青從薜荔分竹深遲引月墻短易
過雲遙念藜牀夜齋心著述勤

水國詩和顧伊人

下隰年年稅未成樹頭布穀枉催耕何須毒霧愁爲雨乍得輕陰喜當晴
蕉葉滴殘隣婦淚荻花吹斷野樵聲無端社燕辭巢去定怪當門一棹橫

飯萼青無酒次日寄詩相嘲步韵即答

水漲溪田夜夜平十朝僅有一朝晴君來索酒偏豪上我媿空囊太瘦生
花護苔磯鴻鴈靜人歸煙艇鷺鷥驚無端詠唱松陵句盡入愁雲作雨聲

和陶擬古同白庵作

開門薄暮望遙對南山隅誰家獨晚炊儼然煙光舒隣翁偶相過班坐愁
吾廬爾我風雨後入口皆舟居不惜舟居苦但傷田禾蕪顧瞻孰樂國去
去將焉如

附白庵作

大婦愁朝飢揮涕向東隅小婦愁晚飢蛾眉結不舒去年五月中游魚
入吾廬今年五月中有姓產吾居不獨禾黍沒兼令瓜豈蕪儂愁有萬
端皇天獨晏如

諸庸甫家社飯

雙扉烟雨閉菰蒲蓮社棲心避世徒家學東生移泛宅身同漫士老杯湖
留賓截髮成佳話對客揮毫入畫圖疎磬一聲纔住處隴頭歌唱起樵夫

舟居

田園蕪廢水潺湲贏得無營日就閒十指懸椎紅蓼裏一家炊飯綠荷間
火雲乍蠹愁飛鳥雨氣全收見遠山鄰叟不知何處去數聲羌笛釣魚還
白庵見贈移居詩次韻奉答

立錐曾未結疎楹萍梗天涯託此生無力買山卷石地有心求友十年情
時時酒債兼詩債往往棋聲答水聲誰道移家輕似葉尚多妻子未全輕
附白庵原韵

自愧蝸廬不滿楹，竟無行屋住先生。灌園原爲他人計，買宅殊慚故友情。懸榻尚餘一客地，傳經遙聽兩書聲。浮踪久矣如萍絮，不道移家似葉輕。

次和白庵枕上吟

於物無營是學仙，於心無著是逃禪。花迎玉露枝枝笑，月落金波處處圓。幻影休貪蕉下鹿，潔身宜似樹頭蟬。莫嫌夢裏常多夢，且和君家說夢篇。

瀾漕諸氏墓

平中忽一突，迴環水如帶。漢唐無寢園，諸家墓門在。

次和黃幼玉夏日早起

宰宰天南落落星，隔牕分影透疎櫺。苦吟怯似空蟬腹，畏露愁如病鶴翎。日月已知丸作客，乾坤久悟草爲亭。年來學道心無著，平日全須此刻惺。

白庵草堂連飲

瀾水中分蔭柳榆，望衡對宇接歡娛。互誇甕粟還餘在，頻探筒詩已唱無。醉擘蟹螯花盃手，暗添魚網火依蒲。歸來一笠臨風側，笑語山妻爲手扶。

次韵劉文成夏日雜興七首

先是戊子與參向辰子音皆有和作家大人亦和之今夏苦雨不能對書乃邀白菴同和以消永日

扶疎薜荔當籬垣，颶母風吹雨打門。碧浪似雲翻白晝，青燈如夢照黃昏。兵戈未定書巢破，煙火裁通土銼存。今日落花誰作主，却令銷盡黯然魂。村村水漲柳花餘，夜夜鵝鵝鬧索居。兒子美船行貫酒，山妻插滬學求魚。占晴欲廢田家曆，種樹慵抄先隱書。贏得北窻高臥穩，問津已斷故人車。清齋日日愛炊糜，留作高陽歲歲悲。久濕菌如衝雨笠，乍晴人曳看雲蓑。眼枯芳草王孫淚，腸斷西風帝子旗。記得去年三月裡，一場春夢繫人思。菰煙蘆月恣清遊，茶竈書牀盡日留。茆屋未秋風已破，秫田失歲雨先愁。說經不到無雙地，求友難逢第一流。何必漁陽能寫恨，夜深蛙吹鬧林頭。綠波渺渺暗荒郊，日與忘情草木交。蘆葉一灣圖鷺宅，蓮花千歲老龜巢。移牀就樹雲爲枕，倚竹懷人月滿梢。不用勞勞叩詹尹，十年前已決誅茆。斗指南丁秋又催，璣衡往復動淒哀。星侵帝座何年見，彗掃旄頭永夜猜。西

蜀青盲成皓首睢陽白骨長蒼苔最憐野老無窮淚都付江頭酒一杯
采蓮新社傲天池物外同心學道宜止酒久慙根矩介盜牛差畏彥方知
一潭雲淨波生處十里香來月上時我欲忘眠客忘去幾回潦倒碧筒絲

秋水

夾岸蘆花秋水清桃源寂寂少人行霞明山鳥獨歸去雨歇林蟬齊有聲
舍北敗荷當鏡立床前織月倚空橫比來天地多憂患落葉金風一夜生
今歲佃田十二畝以三之一種秔以其二種秫叠遭風雨一望盡
白已心置之越三日復有青青波浪中者非分所獲逾于大有家
畜童子二晨而出午而歸洒掃之餘兼薺茶蓼人日一二行止適
瀾上諸君采蓮頑潭之土見而嘆曰噫時將秋風并日而治其尚
可及吾助汝庸夫乃呼其一僕一婢至且了則其弟之僕至白
菴則命其佃兩人至窮日之力遂以終畝且携蔬挈飯而來不煩
吾酒餽餉也此一役也諸公其有三代之風哉顧予何能坐享公
田之利既深銜戢行自媿也是日白菴有詩見貽因次韵和之卽

以爲報

插秧頗費工薺艸頗費日風雨一朝來生死爭瞬息是以天與人其數常
不敵吾家兩奚奴濕毒爛雙膝此亦一人子何忍殫厥力戴星自往還奴
亦頗勤飭獨嘆兩人遲不及多人疾厚意感君輩亞旅呼相給鄉約如藍
山高義同緩意邈哉思前修生我慙媿色南州徐孺子非其力不食敢當
公田利一家八家役

移家月餘書囊琴匣盡置村中頗不經意客以爲訝因簡寄一笑
莫訝山村風俗奇淳如皇古少人知一奚呼我猶稱字二子炊甗誤作糜
溪曲每逢還劍客樹頭曾見掛錢時青毡吾亦忘吾有不鎖門庭不治籬
毛子晉載書攜酒見枉却贈

水漲衡門臥野漁雙橈攜酒扣吾廬花知愛客香先動月爲留人影尚虛
龐老肯容床下伏中庵王郎欣受篋中書獨悲慟哭西臺記何事鐫成十
載餘

晨起

銀漢迢迢星在天貪看月落不成眠隣翁入市忙回棹報道兵符又捉船
奉酬陸巽庵十二辰體詩

不願生作永州鼠但願牛角千番紙公然晝虎行市中屏跡當如脫兔駛
六龍不復御天飛一蛇甘自焚山死門外喜無車馬喧掃徑惟待羊求耳
舊恩戀戀供奉候中夜雞聲拔劍起狗苟蠅營何足云一豬不捨尚如此
和陶咏貧士七首荅陸翼王見贈

結廬水中央漁叟相因依小舸薄菱叢坐釣斜陽暉孤鳥失其群唧哀不
能飛窮睇緬舊林去去將焉歸中宵起浩嘆所感非寒飢四十尚無聞已
矣吾衰悲

憂世固戚戚樂天亦軒軒素心卜南村雅集追西園區區簪與紱棄去如
雲烟有時對周易小窓獨探研悲哉投閣人玄白徒空言千秋萬歲後誰
為真聖賢

吾聞陶淵明愛張無絃琴揮杯撫松餘歌咏出天音傷哉先生沒北道不
可尋我生千載後汲古以自斟三復咏貧篇猶然非所欽忘貧不亡貧乃

為達士心

喪亂六七載長揖辭東婁寒潭雨雪中高臥無唱酬我愛平原君所學希
程周時時雙魚來必為吾道憂當世有若人邈焉寡其儔一城阻千甲命
駕復何求

十年懷一刺硜硜無謁干肯如堂下囚號呼堂上官種田不逢年一日不
再餐芙蓉以為衣風露忘其寒耻為飢所驅辦此乞食顏雙雙白板扉曉
夜永閉關

日月如弄丸寸心如轉蓬頗亦學著書窮愁不能工卓哉高義人漢代傳
兩龔餓死棄溝壑苦節慙未同一斗自然合三杯大道通庶幾或流亞吾
願長相從

蔚村有名嶰更喜無監州痛飲助清譚往往高人儔吾子天下士方今第
一流胡不一買棹慰此調飢憂新詩既披吟舐墨聊和酬願言再申誓皓
首同束修

嚶水汪昭茲投詩見贈賦謝

客從城南來遺我行波濺開牋見新詞妙理何芳妍其學本六經其人必
聖賢置諸懷袖中譬彼韋與絃由來下里音和者或數千對此白雪調含
毫不能宜孤村風雨夜燈火爲凄然

已丑中秋將移家隱湖與石隱翼王諸子論六書之學和陶斜川
詩言別

三日秋雨內來往不能休相對非今人曠若皇古遊六書剖疑義舌辨如
雲流精言駭池魚奇響驚沙鷗茲事亦匪細功成在墳丘許徐何爲者恐
非吾黨儔恨不起蒼頡侍坐相論酬未知子雲亭有此樂事否我年未四
十嘗懷千載憂黯然自茲別好友將焉求

鹽鐵塘別石隱寒溪桴亭默庵

回首愁雲思惘然舟分南北淚如泉十年兄弟空雙鬢四海功名剩一毡
看世有心留白眼埋憂無地問青天何時合買深山住欲借襄陽百萬錢
蔚村別幼玉且了白民惠甫萼青

蔚洲村舍是吾家近隔瀾溪路一丈雪裡夜過高士屐兩餘春鬪大官茶

丹雘白犬乾坤異碧浪紅雲歲月賒惆悵別君何以贈年年無恙問蓮花

別梅仙伊人

三年水國釣魚舟一枕騰騰學四休鬼腹盈虧茲上下燕巢來去社春秋
簞瓢不輟顏琴樂絲竹曾誇曾殿留今日碧潭分手處斜陽哀鴈可勝愁

單腹不辨... 三子水國... 眼對山... 其難白... 大... 其難白... 大... 其難白... 大...

確庵文集

卷之二

隱湖集

起巳丑九月盡甲午

巳丑仲秋移居湖頭村之陶家舊廬毛潛在和陶移居詩見贈次

元韵奉酬

一枝小借棲乃得陶家宅移居挈妻孥樹暝溪將夕入門忘主賓擁篲爭先役載酒自西林幽光賁中席微雨洗空庭清言慰夙昔經學非毛公帝虎共誰析

平生寡嗜好所好在書詩抗言談孔孟下士大笑之獨有素心人遙遙百里思重陽風雨候落英正其時望衡共晨夕歡情方自茲却燒筆與硯毋為君苗欺

湖村晚興十首

舊居七十二蓮潭一棹移家湖水南湖水平分潭水碧晚來添得有山嵐山南山北落霞紅處處炊烟浦浦風徐聽櫂聲咿嘰近賣菱人叫荻花中

蛙喧雀亂鼓頻過一片秋風穉稚斜笑指歸雲擁溪樹女郎齊散大棚車
陶家宅舍背山陂板屋斜曛面碧池預報來秋當種菊呼童編棘作東籬
湖流東去急于潮蟹舍漁燈取次挑一抹人家是何處鄰翁指點七星橋
朝從東渡暮西回布衲隨身稱舊裁怪得兒童不相識山僧何處又歸來
村姑沽酒鬢蓬鬆青布包頭白抹胸刺得小舟輕似葉沿溪采去木芙蓉
朱莊涇畔見人烟近水雕胡蝦菜鮮隔岸便通汲古閣夜來聞到賣書船
百家村落號湖頭雲物蒼茫鎖暮愁何必西山有楓葉周遭霜樹已酣秋
黃面瞿曇叩佛前踈鐘遙與夕春連誰家小犬聲如豹依約風情似輞川

虎嘍水

殷介平讀徐烈婦張傳作解佩刀樂府以傳其事烈婦許墅關
人也以人重矣予因賦虎嘍水一篇以附于介平之後

虎嘍水何滔滔東南下西北高關吏橫舟作關橋解朝泊估客船暮泊估
客船朝朝暮暮估客無數不事詩書而事刀布秀稟坤貞生此烈婦解烈
婦之生實命不猶于歸于徐歲月未週雉雖其偶山哀浦愁呱呱遺腹亦

孔之憂解兒髮日燥兒年日成娟娟玉立可以慰寡婦之心延師于塾爰
授之經戴星而出戴星而入視我機聲解我生之後遭逢亂離磨刀霍霍
佩以自持解乙酉夏戎馬縱橫止民舍義不受辱泣且罵拔刀斷喉見者
詫須臾含笑入地下嗚呼須臾含笑入地下六守貞曰節捐軀曰烈二十
二而孀居三十二而引決節與烈兩無缺虎嘍水永不竭烈婦各永不滅解
衛節庵先生國初侍御也持身清素圖筭茹以見志謂之二蔬圖
介平有詩紀事次韵和之

庚寅四月遊虞山

一瓢官舍橐二簋暮年身獨行非驚眾真清却畏人幸辭肉食請喜共菜
根陳賸有遺圖在家風正不貧

秋日遊維摩寺

載酒過山西雲深谷口迷數峰青自出萬樹綠初齊鳥帶餘花亂人隨返
炤低晚風歸棹急回首憶藤溪

但餘老樹當樵徑幸有疎鐘送客舟堪笑維摩古居士病身消受一牀愁
不寐爲金孝章賦

凜凜朔風寒皚皚霜華潔耿耿彼姝子憂來難斷絕永夜何所思所思在
天末踟躕空復情誰者訴悲悅譬彼飲川魚展轉不能說俯觀階下影仰
見牀前月矧此深閨心幽光淨如雪

次韻徐仲昭瓶中落梅四首

一枝不借艷陽烘始信人間色相空點筆暖雲能作雨覆書香雪自爲風
芳魂冷逐筠簾散好夢虛憑紙帳通顛顛故應成棄擲肯同繁卉喚紅紅
折來薄命自尋思況是江城濺淚時顧影祇憐輸錢石全身猶幸剩鬢眉
未容浪蝶侵書坐爭許狂蜂過幔窺收拾冰心黯然去縱教拂拭向誰施
斜倚書巢遠客塵香風吹作百千身膽瓶別有寒暄候斗室依然去住春
羌笛一聲虛弄色玉關千里暗傷神飄飄棄得人間事疑是前生漢子真
十分春色九分回零落何如葬砌苔遷客有情依故國美人無夢遶陽臺
挑燈賦別愁千斛呼酒招魂怨一杯忽度春風披硯席暗香還欲上枝來

贈歸玄恭五首

書劔雄風病未能扣門七發賴良朋亂餘身在同爲客溺到冠時共作僧
天上銅仙辭漢殿人間金盃出唐陵雞聲喔喔驚殘夢挑盡菀牀雨夜燈
多君意氣重于山一笑頓開壯士顏詩到變風都不採史當閨統便從刪
短牀未必存三尺廣廈嘗誇置萬間自別君來無好思空餘湖上月光閒
散髮狂歌話水濱含悽爾我兩途人時時潦倒聊當哭日日寤愁不爲貧
去國共憐遼海帽吹簫相對市門身何年攜手雲深處一向西臺慟故人
天縱君才數偶奇未須惆悵美人遲高風只合西山巖壯志何勞博
烏鵲夜飛明月見杜鵑春叫落花知臨岐却悔無持贈悵望南雲有所思
袖出新詩淚未乾對君請罷動悲酸鬼歌夜雨山川怒人泣秋風草木寒
劍不負心休浪擲琴非知已可輕彈龍蛇尚有存身術象在天山仔細看

辛卯花朝嚴仲木招山中看梅風雨不赴夜坐月色忽佳次潛在
韻

鳩居吾亦愛吾廬傳道城春花事初香滿山中遙置酒雨來湖上嬾巾車

懷人擬續王猷傳種樹聊鈔沈勝書燈火紙窗青未了一簾華月照衣砧

沈湖

疎樹人家斷復連片帆隨意入新烟湖添夜雨水不定山怯春寒花尚眠
車馬笙簫天上樂綺羅士女鏡中仙愁城聊借清尊破短髻風吹又一年

過吳門有感

不泊吳關下星霜又幾回憶車新使舫烟艸舊歌臺易入王維恨能令庾
信哀桃花綠底事還傍戰場開

訪陸履長不遇其尊人子垂先生出心史手蹟拜而讀之

賣卜何如謝侍郎著書借隱有高堂井中四百年間物跪讀猶聞翰墨香

大木勸村人築岸

禹跡茫茫不可期年年春水漲春池未愁梅子將黃侯先怕桃花欲放時
雨打青門瓜折項風吹栗里柳披枝征徭那有深山避乘勢隄防莫漫遲

滇南路爲孝子黃端木作

滇南路八千里外有嚴關十二重內有防秋百萬士前有食人之虎狼旁

有深谷荒菁惡溪絕澗苗獠之雜處其危也如此誰其行者黃孝子孝子
行此何爲爾父名孔昭字含美遠宦大姚兵戈阻絕不得通音問供滌隨
孝子念之泪如雨一朝徒步向天涯別去妻孥猶敝屣艱難辛苦得達白
鹽井父母見之驚且喜秉燭相看如夢裏孝聲動滇南涕泣或拜跪終
奉雙親返故閭往來之期五百三十日而已嗟乎孝子亦人耳乃知天下
何事不可爲但少至誠如孝子

秋日嘉禾屠閣伯俞右吉張白方潘美合陸水修諸子見訪論學

於淮雲寺口占贈別

弄月吟風興不孤平分吾道與鴛湖一宵蕭寺明燈話得似天泉擊鼓無

寄訊陸履京賣藥

曹植何曾遇神女陶潛豈肯學懷春陳思子亦有神賦

秋自此銷遺恨二陸從來號絕倫弟鯉度死節市上神仙無漢魏山中艸

木有君臣函關注就方書否醫國他年内相身

江南曲

江南人烟百萬家王侯第宅凌雲霞徵歌夜夜三秋月載酒朝朝二月花
誰知繁華有顛顛如火如茶風雨至西子臺前蔡琰笳莫愁湖上闕支騎
吁嗟江南真可哀十載悲歌安在哉烽燧暫銷鼙鼓歇簫管樓船依舊來
獨有盈盈蕩子妻年年歲歲守空帷天高地迥無窮恨花落花開春自知

憶昔三十韵贈吳魯岡憲副

憶昔當陽日維公服政年文章緣吏治綱紀正官聯至止調琴鶴供張臧
素餽臣心清似水吾道直于弦力欲傾先否才堪補積偏三吳資鎖鑰四
海望旬宣觀察聲名重朝廷倚仗專亡何丁喪亂不奈遣屯適粉社祇祥
動薇垣慧李躔蕭蕭鳴朔馬跼跼陸南蒼報國無權藉傷時有涕漣伴狂
存性命小隱閉園廛介性追根矩貞風憶仲連雀羅忘貴賤魚服溷愚賢
蕉鹿貪無著杯蛇避更先眾人皆醉矣老我獨怡然酒愛沽千日藁羞刺
一錢手談凭瘦石茗戰試名泉古德中邊味南華內外篇道因窮更樂心
以靜逾便為抱江山癖常移書畫船嚴灘秋弔古禹穴夜探玄艸木觀風
土昆蟲驗性天浣花歸杜宅蒔菊返陶田雒下人偏舊香山社再傳匏瓜

甘自繫碩果幸能全門內栽桃李庭前藝梓柳澆書攤竒腹得句聳吟肩
欄闌呼名鴨盤供縮項編已堪娛歲月何必問坤乾

壬辰三月訪黃陶庵殉節所見壁間血痕縷縷向空拜而哭之

天心人事縱難回氣作山河亦壯哉碧血九京懸劔恨素車雙淚束芻來
流風尚有傳書在末俗誰將大道裁還憶方舟江上語曾于舟中論道可憐絲髮
漸相催

西隱寺贈微言上人

為愛逢迎第一流空山花落此淹留鶴巢松影千年佛經卷鐘聲百尺樓
慧遠社招元亮入高閑文向退之求清言始得忘機處斜日碧雲生暮愁

和停雲四章

暮春既望翼王陸子迂子過嚶嚶地多君子夙奉陶庵之教既
見談道甚歡越數日將歸隱湖適讀陶庵和淵明詩多言性命
之指因次其韵贈別諸同人匪和淵明實和陶庵也

我求友生如曠瞻雨誰哉同心闢此榛阻既見君子天懷共撫斯文在茲

勞我延佇

陶庵有學聿追鴻濛紹我洙泗軼彼姚江春風在庭明月在窗爾其以歸
執鞭相從

維木有華靡靡春榮當秋而實乃見性情各敬爾躬與時偕征毋爲中道
負此平生

魚潛于淵易集于柯孰爲尸之扇以微和嗒然忘言一語爲多春云暮矣
欲別如何

林衡者閩中奇士也將歸詩以送之

林子天下士篤生南海隅內挾龍蛇心矯矯與人殊外稟熊豹姿兼兼微
有鬚石齋百世師乃出其門閭正學以爲勗日夕相勸勸道德我所寶文
章持其餘大器登明堂爲國儲璠璣人倫忽道盡宮闕爲丘墟漢法溺儒
寇秦令燔詩書丈夫會有志安能負頭顱掉臂走川谷溷跡于樵漁中夜
立空庭仰天長歎吁著述千萬言函關踵潛夫頓然念中原靈秀之所都
斯文苟不絕必有賢聖徒芒屨渡錢塘鷓冠過姑蘇析疑止婁江賞奇來

隱湖聯牀述所學不謀乃同符涉筆卽滔滔矢口皆魚魚譬當饑與渴
我有醞醑此樂不可得奈何賦歸與吾聞子朱子曾與西山俱教鐸振君
土風流猶在無明興三百載子當成大儒吾衰久矣夫讓子以前驅日邁
月斯征古人言豈誣努力追素修闕此荆榛塗

次韻徐次桓胥山草堂二首

萬山之麓必有泉萬水之匯必有川載酒輒過成都宅招隱先求綿上田
草堂有人自太古木榻無語常經年不盪不扇者何事研索堯夫先後天
南山之南深復深白雲漠漠春陰陰相國祠堂渺何處胥山有伍相國祠漁郎桃
花如到今鳥語蛙聲相下上月光燈影同浮沉遙知此中美人在抱膝支
頤時苦吟

次韻金孝章寫怨六首

吹盡參差意未通望夫山下夕陽窮生憎蘭葉戎戎綠坐惱蕉花故故紅
好夢依稀啼鳥後閒心飄忽亂雲中合歡繡被前生話寂寞風光歎轉蓬
倦魂好與睡鄉宜欲上粧樓步屣遲拭淚錯應隣母訊含情羞語侍兒知

蝸涎雨後空成字，蟾網秋來倍有絲。敲斷玉釵，還不見盈盈一水，繫人思。
桐露垂垂，染墨池千迴，萬轉不成詞。涼生條脫，秋風早光，撼流蘇曉日遲。
墮馬笑看梁苑，髻曼蛾愁，憶漢宮眉紅顏。命薄應如此，腸斷空禳，祇自知。
倚遍闌干，坐曲房簷前，小立夜初長。回文枉寫千行淚，辟惡慵燒百和香。
雲雨人間，無楚夢，星河天上有。裴航可憐，結髮爲夫婦，孤負佳期是不將。
衝烟獨夜，浣溪紗肯逐春風鬪。麗華睨曉黃鶯綠，底事呢喃紫燕，傍誰家。
郎顏定向金微老，妾而長垂玉筍斜。記得漢臯初解佩，也曾相許，貌如花。
老此羅敷未嫁，身琴心空，自目挑頻舞衣棄。久飄爲蝶，歌扇拋殘，化作塵。
雁帛浮沉千里，信鶯花顛顛，十分春登樓。一畫自芳艸，何處王孫愁殺人。

孫銘常畫蘭

畫蘭不盡土，畫棘不盡蘭。前哲抱微尚，寄托皆高寒。今之傷心人，彷彿同。
此觀逃禪學，劍餘弄筆如僚丸。一花一香氣，一葉一波瀾。

次韻孫子長歲暮雜述十首

蠅宇蠻牋客，遠攜小窗吟。罷日徂西論，交君定推龍。腹避世，吾方學馬蹄。

十上秦書何夢夢，三分漢業太栖栖。昨非誰覺今朝是，不遇陶潛不破迷。
攤書籠袖擁寒爐，愁見初髭柳數株。兒子欲教焚筆硯，故人強半潤酤屠。
并羊是處歌犢首，龍馬何年記負圖。搔髮問天天不語，函關閒殺老潛夫。
畫前有易靜中叅，心在空旻影在潭。風蕩水田遙濺白，雪銷山郭半接藍。
壺傾一任梅相笑，朋好何妨鶴共談。煨就蹲鴟聊當肉，嬾殘滋味有餘甘。
溪風山雨撼中林，篝火青青夜氣深。鶉落劍花饑欲死，鶉懸泉著冷全侵。
閉門我愛塵中甌，除道人誇肘後金。明日好尋驢背客，灞橋詩思正堪吟。
雲壓荒郊天地翻，貧家閒况共誰論。病妻絮被貪高枕，弱女茅簷學負暄。
擁腫無文獨樹老，嗟呀存骨小山尊。烟深艸沒求羊路，惟有梅花長在門。
江籬冉冉澤蘭香，點點鷓鴣鷓鴣行。曾不恡情紫去住，何勞端笈叩行藏。
長腰米向隣翁乞，縮項鰻呼稚子將。縱有雨雲翻覆盡，衡門烟月只尋嘗。
無錢羞盡笑空囊，木葉同于病骨輕。白水未通千里夢，青山徒負十年情。
故侯甲第荒苔遍，義士沙場宿艸生。短劍賣來還買犢，鹿門判得老躬耕。
藜牀木榻忘春秋，時趁微和汗漫遊。豈有星文驚帝座，並無香篆漏漁舟。

閒來詩卷橫雙袖醉後花枝插一頭不是潯陽多隱士籃輿何以慰窮愁
關廂終歲斷經過非避元規懶較多田父好懷容對答村醪妙理足婆娑
種瓜畦作鋤烟圃鬪鴨池成浴馬河賸有武陵天地別桃花流水更如何
青筠歲晚影檀欒臘去春回增慨歎望帝鵑魂啼未了杜陵花淚澣將乾
差排舊恨聊乘化收拾新愁強學歡猶作南島三繞樹帶星何處一枝安
陳義扶同年以書訊病兼資藥物賦此作報

紙窗燈火入殘年病後閒居更悄然喜有長鬚遺藥餌媿無清酒祭詩篇
行踪只似離羣雁愁緒還如不繫船一卷殘書一竿竹遲君烟月五湖邊
癸巳春石林上人見寄鄧尉梅遊八詠湖上諸公各有和章憶予
甲申春卜隱潭東流連忘返回首舊遊如前生事矣感而次之

胥江曉發

尚憶前生夢曾爲避地行殘星入市亂初日女牆明花木能春色山川不
世情只今江上路但有怒蛙鳴

登七十二峰閣

凭闌聊約略七十二高峰影入太湖水不知更幾重風疑吹掌動霧忽滌
眉濃對此生微悟乾坤盪一胸

虎丘坐月

踏遍湖頭雪來尋寺裏峰酒帘知曲徑茶幔見高窠客有攜絲管僧無鬪
箭鋒坐深歸路白明月一聲鐘

雨窗卽事

籃輿香細細竹屋響淙淙雨急鳥蹲樹人歸花在窗亂雲迷鄧尉殘夢落
吳江濟勝非無具春風未可雙

家家春鳥鳴

鳥亦何多事衝烟處處聲枕高齊覺曙門掩盡知晴斷續隨芳樹愁歡送
落英感茲求友意爲爾賦嚶鳴

賦得天寒有鶴守梅花四首

落木蕭蕭遠戶吹梅花無語鶴心知似憐鐵骨難爲別如對水顏有所思
立破香光入靜後踏殘疎影月明時仙姿拚老荒臺畔未許春風向北枝

永夜踰躑靜不喧凍雲漠漠倚衡門天涯庾嶺無消息地角西冷有夢魂
翎欲梳時吹片玉爪從舒處點雙痕東風歲歲相期待何日銜書到故園
豈必岩棲伴鹿麕梅花深處便爲家啄殘夜雨飄紅玉舞罷春風長綠芽
求友只貪香寂寞避人偏愛影橫斜羅浮夢斷蓬山遠空惹悶愁怨歲華
纔放籠中去故山忽聞玉笛旋飛還春生何處雲千里夜落無聲雪一灣不
忍別離傷歲暮儘容行住似僧閒華陽高士能銘否瘞骨還須玉炤間
癸巳初夏雨後潛在邀予同石林上人遊虞山諸泉歸而作詩以
紀其勝

桃源澗

簾輿次第女牆低石磴如星坐不齊人佛袂除分月令三月三日修禊門邊遊人最盛乾坤興廢一招提桃花久共香雲散澗水猶爭好鳥啼只此逢僧閒
半日已添波浪到山溪

石屋

吾聞古三吳禹貢揚州域胡爲鳥目山乃寓鷹揚跡相傳太世人居此世人聞見恒

好奇徃徃山水緣飾之仲宣登樓非一所昭明讀書遍天涯見亦不足信
聞亦不必疑但取前人風能爲後世師只今石屋清泉在隱者孤踪係千
載芒鞋藤杖共招尋青山不用一錢買泉流石屋東紆迴滴瀝懸長空泉
流石屋西盤盪消泐無端倪泉流石屋北湔湔白玉髮可沐泉流石屋南
灑灑明珠手欲探吾將坐其中枕其側穴土作銚煮石爲糧可以忘年而
永夕愚哉尚子平此願何時畢君不見石屋之水深復深洗盡人間萬古心

破龍澗

龍來澗水腥龍去澗波冷長窠夾磬音明燈見幡影有僧導我入花木非
人境論詩鬪槍旗月落燭兼秉妙香羣動息悠然發深省微聞門外喧彌
覺山中靜

連珠洞

破山度嶺緣崖路傳道連珠深洞處洞門盤石狀如虎抉眼摩牙坐烟霧
其中忽示一奇觀欲言不言交相顧誰向山頭鑿井幹崩奔風雨波濤注
五采寒光射初旭珠璣大小落無數參差回互佛燈前狡狴俛首象王怖

乃知天地有大文歎息徘徊不能去

秦坡

盡道烟光裏秦坡一綫明崩雲山有語屑雨樹無聲谷暗深眠鹿察危冷
墮甍日斜遊未了回首動離情

贈友人二首

曾將杯酒酌弓刀艸莽書生膽氣豪清白故應懷舊德愚忠豈為博名高
棋敲夜雨爭殘劫鬢入秋風感二毛矍鑠據鞍人未老印溪明月長波濤
當時風雪避人行長向君家話不平回首遂成千古恨凝眸已是十年情
襟期磊落難兄弟患難周旋托死生我有所南遺筆在壯夫心事特書明

觀奕六絕和錢牧齋宗伯

賭墅聊當鉅鹿看侵邊飛角落聲寒分明勝負無人識只為交爭劫未闌
奕經云低者取邊高者取腹
不爭腹而爭邊女見其成也
一着先人豈在多推枰斂手意如何等閑跳却雙丸去祇恐樵夫欲爛柯
巧遲不如
拙速奈何

濟河焚楫有成勞破釜沉船秦將逃毋夫一先寧失子昆陽國手果然高
智勇全於一局收棋逢敵手要深謀方圓動靜周天合眼底何人李鄴侯
西敲東擊是耶非下子還應審事幾欲殺天都并野利可憐身已被重圍
誰是重瞳誰獨眼孰為墨守孰輪攻握奇多少孫吳筭盡在旁觀一笑中

壽費省公表兄二十六韵

憶昔髮未燥學為科舉辭審形譬無鑿不能辨妍媸時兄館城南晨夕質
所疑中表固骨肉道義即吾師稔知兄最真焉敢阿其私維兄具文章同
學羣見推腹笥窮六經專家治毛詩維兄抱隱德竭心侍嚴慈入戶登其
堂恂恂復怡怡維兄秉高義一介堅自持操竿立齊門掉頭不肯為蘊藉
三十載可用為羽儀亡何彈指間淳耀忽潛移楊朱泣岐路墨翟悲素絲
亦有草玄人榮名正其時兄獨顧而笑甘與漁樵期青衿仍國恩其忍終
負之嗟余亦廢棄匿影湖之湄白髮老高堂教授以自支望衡正相並對
宇遙參差情話寓詩篇徃復常見貽遊子在天涯稍稍慰離思窮愁有樂
境世俗誰能知兄齒今杖鄉千古清風垂質言愧無文聊以侑一卮願同

維季年投老商山芝

文介石先生為吾覺師帥十年于茲矣近黃孝子尋親歸述滇南有路可達先生遂有歸志此邦之人將于誰而問道乎乃賦詩六首以尼其行

園橋抱籍久蕪萊祭酒家從六詔來青火夜迎劉向入絳紗晨侍馬融開言人思孝扶天地都講詩書起俊才忽報降幡颺牛渚西風一夕捲堂哀

長江鍊鎖竟何為中夜旁皇泣素絲盡日筆隨降表進草玄人恐獻文遲武陵洞口桃花笑朱雀橋邊燕子知獨有孤忠老博士焚冠和淚寫新詩

先生有焚冠詩

荒城斜日數歸鴉南望愁雲不見家五夜杜陵驚鼓角十年庾信老風沙瓜官粟吏看人事鹿苑雞園度歲華傳道故山春色好烽烟無恙有梅花

十載春風緒論多忘年何幸共婆娑時從野寺烹葵話兩會曾向湖村踏月過庚寅先生皂帽遼東陳俎豆黃巾高密化兵戈寇屠呈貢可憐

回首辭官日落木蕭蕭兩鬢皤

楚水吳山艸色微輕帆欲共塞鴻飛黃冠未遂成仁志皓首還思仗節歸城郭已移啼鳥換呈城妻孥猶在故人非王原至後傳消息歸信惹得新愁泪滿衣

尚有將軍出漢關小朝廷是舊江山文犀輸貢哀牢國狂象前驅板楮鉅鹿馬嘶秦楚際王官人在亂離間歸心且付東流水待到蒲輪始放還

讀吳梅村宮詹南中雜詩却寄三首

學士風流當代師空山明月鶴書時黃冠投老孤臣志皂帽全生千古思出處不言秋水在登臨有恨落花知即今仗劍驅車日已賦襄陽北闕詩

十年憔悴雨花臺釀酒狂吟亦壯哉自是曲江悲細柳非關凝碧詠高槐烏衣日落青山老玄武漁歌白水哀莫歎王侯無第宅寢園猶見野樵來

金戈鐵馬日紛紛小隱梅花天地分放鶴故人攜酒慣換鴉道士乞書勤徵君自有歸來賦丞相何勞生祭文不見白門雙槩急一天詩思動江雲

秋日得同門許琴公劄遙寄

剩水殘山泣暮蛩素書温語托秋鴻一瓊迎養功名薄雙鬢潛移

老大同雪滿舊庭芳艸綠劍懸空隴落英紅水書云湯夫子無恙包驚幾物故斷橋明月揚州夜回首凄其是夢中

和吳宮詹南中八詠

上方橋

虎踞龍蟠古石頭垂虹重見枕溪流時馬蹄踏去江南雪蘆管吹來塞上秋幕府岩堦非故國泰壇烟雨一荒丘笙歌隱隱歸何處依舊雙橋送莫愁

鍾山

蔣山當日寢園開翠栢蒼窠王氣迴萬國衣冠和露立九天鐘甍入雲來有請開煤鍾山者觀卽今石馬悲無主誰復椒漿薦一杯聞道璉伽誅戮早秋風靈谷動淒哀察破其謀立斃之

臺城

都城百雉昔今同不見烟雲起故宮翠袖市門驕北語白頭里社哭西風江豚夜舞鼉龍怒石燕朝飛鳥雀空玉樹金蓮還在否六朝如夢落花中

國學

六堂禮樂絳紗明稽古曾誇內賜榮弟子盡傳楊伯起國人猶識鄭康成燒書有劫儒冠悞釋菜無時野艸生稍喜南廂園叟在亂離辛苦十年情梅村有南廂園叟詩

觀象臺

太史靈臺候日基風饕雪虐土圭移銅駝實下通侯涕仙掌虛存漢帝思勝國璣衡昭代法鞠蹴蹴敬泰西律歷後人疑櫬槍枉矢如瓜墮帝醉均天那得知

雞鳴寺

燭天光氣御書斜寶誌鬚眉勒漢家興廢不關今夜月戰爭還發舊時花雞鳴山寺悲魚磬鳳去臺城怨鼓笳縱令高僧開講席蕭條無計禁鳴蛙

功臣廟

百戰功高報禮長千秋廟食擬蒸嘗漢家事業推三傑昭代勛勞冠六王尚有龍蛇垂画壁更無香火到迴廊雲臺麟閣歸黃土愁聽寒鴉噪夕陽

玄武湖

太平門外後湖深六代繁華記古今自與邦家存載籍更誰車馬狎登臨
漁歌近罷遊人禁烟水重傷學士心蕭瑟子山詩思好但愁何處問知音
有懷西田寄王烟客太嘗

吳塘鴨綠漲波渾一棹西田繫夢魂屋角荔添芳杜色石均篁破落花痕
牛宮遠近人歸市蛙吹參差月在門耆舊如公能得幾布袍窠筆是君恩
次韵王太嘗西田招隱詩二首

南村北垞犬聲稀綠樹叢中白板扉行踏亂紅三徑濕坐看遙翠一山微
緯蕭蝦蟇隣漁醉打鼓雞豚社叟圍還有芙蓉溪上好呼童裁作水田衣
城闌十里客來稀或有山僧夜款扉望斷綠波漁舍出煨殘紫芋佛燈微
烏啼相樹星千點鷺立蘆花雪一圍退谷杯湖容寄傲十年前已拂朝衣

次韵梅村自歎詩即用贈別

先朝全盛久辭官屢詔何當行路難春色玉鞭回首暗秋風衣帶渡河寬
避人漫倚金門下投老還求鑑水干明月画船蕭鼓待早成青史拂黃冠
少赴故云

讀烟客先生西田三十韵詩却寄

宗彘祖多舊時春白袷烏巾別業新杜甫正當天寶日陶潛終是義熙身
亂離風物添佳句蕭瑟江關老世臣寄語桃花好相待可知儂亦避秦人

金陵

六代繁華一夢中春光未可怨匆匆司勳帥債朝頻貴相國軍書夜不通
綺閣脂波添漲綠迷樓椒火炤天紅長江鐵鎖知何處斷送先朝百戰功

懷葉白泉先生

樽酒江城易別離渚蓮愁盡費相思臨池摹就來禽帖掃徑賡將悼鶴詩
叢菊曉含零露濕小山晴立漲雲遲蕭齋盡日成孤坐閒捲秋蟲落葉絲
和毛潛五君詠次顏特進元韻 門人錢嘏注

司空圖

唐政多頗偏幾微最先洞燭規糖政多僻棄官耐辱競依棲
士依避難辨味獨吟諷圖與自錄論詩有賦酸案筆示高人
當如石墻驚俗眾幽顯本同源死生何足勸詩對酌人或難之圖曰遠人

人觀幽巖一不致非止誓
於此中公何不廢耶

方干

寒山壓明鏡來往素心人于鏡湖詩云寒山壓鏡心此處是家林又云射
策屢不遇揮毫如有神學士吳子華云把筆一官慰魂氣宰儒不遇者十
餘人請賜一官以雙臺表沈淪與子陵並廢宅千載後清風自茲馴

韓偓

冬郎甫七齡字清聲玉溪見李義山贈詩云雛人值鈴索驚
先引事必從幸鸞旗眩韓全誨切帝幸采薇賸悲歌
北山含桃憶歡晏大慶堂賜燕呈越王詩紫宸不可論惟應夢中見

羅隱

昭諫數偶奇公車髮空秀十上不婦女誇姓名朝廷識章奏
鹿之日此羅隱詩也黃祖幸能容衡容不昂思量黃祖慢英雄
匪虛覲吳王劉荆州都移亂世歎息兩同書記朝野事跡後代無人守

陸龜蒙

天隨一怪民自號天隨子翦然抱幽素性好潔几格硯叢脞笠澤書
叢脞之語云鎖案陵句又甫與皮日休有案隄
又著視關鴨筆茶舉以筆末茶爐尚存出必掩戶却擊鮮空腸貯詩賦

懷華天御

懷君秋夜尚湖邊明月微星炤不眠老去共悲雙短髮窮來交剩一寒袍
即今銜石無精衛終古啼花有杜鵑回首任陽風雨棹十年心事泪潜然

雨夜訪馮賓伯

積雨生百愁秋風響林木志士多苦心幽居俯山郭波光晶渺間菱蒲出
茅屋門前五畝畦稻新結束扣門驚主人披衣秉殘燭寒暄各不言開
卷對窗竹淡晨具雞黍日斜盡款曲朝華不再妍雙丸何促速相期崇令
名千秋以為勗

和陸桴亭四十三生日詩

崔奄之妻隱湖

梓亭高臥歲華深萬卷圖書鬢雪侵老去漸逾強仕日亂餘祇有達天心
橫經鹿洞吾儕事義山四十三歲講坐月龍潭何處尋陽朔四十三歲月
龍潭最是窮愁多好句倚蘭重見感時吟

孤村

孤村烟雨惱人多永日捲願擁薜蘿行處亂雲連遠漲望中一葉下微波
翠禽避濕梳翎去白雁衝寒布陣過欲理枯桐對知己不見奈愁何

季秋望日率遜兒拜龔安節先生祠

宿將親王盡解戈金川一慟欲如何全身有主寒棲固念母無家夜渡河
書爲痾瘵陳事切公曾上周文襄書詩關忠孝感人多有集齋當時豈暇求名計
香火千秋自不磨

和瞿有仲讀史雜詠

有仲詠史諸作拮據婦人椰榆男子寄託遙深風人之指也然
諷一勸百母乃蹈相如之失篝燈風雨侘傺不憐因反其意以和之
苧羅山下浣紗人斷送勾吳錦繡春不是扁舟五湖去越王空臥廿年薪

誰將圖畫點蛾螭幸得和親棄虜塵不信但看飛燕在可知延壽是功臣
四十年間復漢家中興天子最堪誇後星易位前星廢但爲宮中有麗華
傾城能動雀臺思一炬何煩赤壁師若使當年歸孟德分香賣履已多時
三分指顧在南陽娶婦曾誇黃彥良只爲喬家有殊色風流公瑾最分亡
江南佛寺一奴才羽檄牀前醉不開結綺臨春空百尺止堪高望五牙來
殿脚春風管領奢雷塘添得墮釵斜當時清夜宸遊曲恰和陳家玉樹花
栢梁灾罷起阿房蘭麝塗燒壁柱香正是蓮花生好步已傳蕭衍入襄陽
明誠夫婦樂無倫金石文章結聚新書散琴亡兵火後可憐清炤嫁他人
唐宮宣事響鈴嚴趙宋鑾儀不避嫌祇有聖朝家法好從來金殿不垂簾

哭同門包驚幾三首

掉臂西山別故園蓬蒿三尺閉衙門只將苦節酬親志聊以窮愁報國恩
江左風流誰尚在襄陽耆舊汝猶存如何一夜金風裏玉折蘭摧不忍論
馬蹄踏雪醉京華轉眼風塵落日斜公子緇衣逃白社初舍人碧血灑黃
沙蒼飄零書畫三春舫擲勞苦波濤八月槎義泉路倘逢江夏輩陶定知

攜手歎無家

剪燭西窗撥棹回共添二豎送愁來辛卯訪驚幾西山別後子亦抱病經歲忽驚溝壑先于
我不及潢汗薦一杯季子泪垂縣劍恨曹公腹痛過車哀儂身久學山頭
石只恐君心不化灰

懷同年包朗威馬萬侯徐定侯許琴公何元長

回船明月昔揚州尊酒狂歌醉未休投轄主人燒短燭墮鞭公子入高樓
人間事去成蒼狗解角身存漸白頭欲寄雙魚恨無路泪痕常對落花流

抱甕丈人歌為顧茂倫賦

君不見漢水之陰一丈人灌田抱甕多苦辛朝與閒雲出山岫暮隨飛鳥
投江濱朝朝暮暮抱不倦飛鳥閒雲兩無戀非無力少致功多只恐機心
從此見長安少年豈識此馬如游龍車若水一朝失足嬰罔羅請君入甕
將奈何達人知己苦不早何似終身貧賤好即今有客聞其風濯足尚羊
以自老茂倫有濯足圖

雪夜有懷沈伯叙

十年風雨歎飄零木榻遙聞老一經世事已如人鮮甕天心終愛少微星
城頭笳鼓悲聲急海上旌旗戰血腥輸與表安僵臥穩夜深嚴雪舞空庭

題程杓石悼亡詩冊

悼亡麗句墨花生為寫空幃歎息聲莫訝安仁似兒女人間何事可無情

詠史二首為弘範也

君不見勾踐臥薪會稽日主憂臣辱真難得一朝吳滅蘇臺焚文種獨鏤
賜倉卒又不見秦王鹿走天下爭捷足高材楚漢兵烏江濺血美人盡
布菹醢韓王烹就中獨有陶朱公輕裝出沒五湖東亦有報仇借漢者
穀甘心事赤窠功高不賞古今理明哲全身貴知止范蠡誠哉間世豪
留侯自是奇男子

鷹化為鳩仲春月當其學習火尚烈但聞淮北橘變枳不見江南枳成橘
從善如登從惡崩渭水難清涇易渾義興周處古豪士一日湧除三害去
徐勣十三曾殺人後為良將功名尊彥章甘作朱梁鬼画像鍊槍何足齒
吁嗟乎素絲岐路真可悲墨翟楊朱空淚垂飲君酒祝君壽但願成仙跨

鶴飛直上瑤池見王母

甲午元夕同人集尉遲廟文介石先生講蔚村三約限真字韻

老屋荒江寄此身鵝黃溪上柳初勻鄭公鄉俗慙君子漢代衣冠見昔人
社散樵漁禽語亂酒催絃管月華新武陵尚有桃花路淳朴山川一夕春

挽殷介平

蕭然應作老僧看月似無心水似寒蟲鼠自天隨付子龍蛇逢歲動悲歎
篋中孤憤留三策泉下窮愁欠一官何日束芻澆絮酒碧雲西望路漫漫

瞿稼軒臨桂挽辭

并序

甲午春明留守大學士稼軒瞿公之喪至自桂林藩臬大吏令
丞以下莫不奔走而拜之國中縉紳先生耆老子弟暨其門生
故舊之屬皆束芻絮酒會哭于其丙舍之旁蓋自國變以來士
大夫之仗節死難成仁取義其感人未有若此之盛者也當公
之在桂也中原鼎沸閩浙瓦解公以書生未諳軍旅首倡大義
定策端州此豈復有成敗利鈍動其心哉及乎皇天降禍大厦

將傾內則馬吳諸臣外則趙陳諸勳鎮曉夜謹誼以亡桂爲事
而公以一老臣拮据其中左枝右梧首張尾決至于嚴關不守
溶江四潰逆知勢不可爲遂乃危坐衙齋幅巾待盡酌杯酒以
呼天却牽馬而不御卒與少司馬從容賦詩同日并命嗚呼何
其壯也繇今觀之一君死復立一君則世傑之忠也留守重地
以一人當敵則宗澤之志也絕命之辭纍纍數千言則文山之
歌也牙將家人慷慨殉難則江萬里之義也死者人之所必不
免而公之死則真可謂重于泰山者已僧虔顧子謂余言公生
平有至性太公病卜于關壯繆之廟得前三三後三三之詞太
公果卒于九月之九日後公謁選都門太夫人病卜于神兆如
初時將給事黃門有成命矣棄不受戴星南返以得侍湯藥爲
快張西銘太史之過虞山也泊舟東臯之畔聞有孺子哭者哀
聲達左右則公以至日祭其先人蓋每祭必然者也太史爲之
感歎不已古人有言忠臣出于孝子之門豈不信哉璠與公之

長君誼忝同籍而有不見荆州之恨于其喪也乃得拜其儀容
想像其為人而作詩以憑弔之其辭曰

殘山剩水強撐持回首中原竟屬誰鎖鑰無人諸將去衣冠有主
二陵
知書生義盡平原日丞相名成柴市時子自殉親臣殉國一門忠孝足吾
師次公玄鑄萬里
難于與

平陂天運亦人謀一柱于今砥濁流招隱東臯看舊業籌邊南國想高樓
中營星隕千秋恨遼海魂歸萬里愁不是別山司馬在下泉含笑共誰遊

少司馬張別山諱同做
同日就義江陵之孫

五載經營志未平溶江半壁老空城曾無將相甘薪膽但有門庭起鬪爭
千古人倫存主僕亦被難陳祥一時吾道見師生別山為公呂蒙後死無多
日枉與人問罵姓名

昆湖家世濬源長耕石還餘舊德堂山水烟雲環丙舍琴書冰雪炤匡牀
僮亡散佚丹青盡家中名圖僅僧老留存翰墨香令子文孫工繼述不煩
晉井鐵函藏

次黃攝六韵贈毛秦叔輔季入類

寶家子弟麗如雲醇謹門風萬石君山水兩湖鍾地脉圖書千卷動天文
王曾有志非温飽李沆終身藉見聞正好聯牀分研席然藜丙夜定三墳
送伊人之澄江見其宗人程崑毓故大俠也

芙蓉城外夕陽斜一棹秋風沂荻花山水舊棲離亂燕江湖新怒戰爭蛙
輕生魏勝曾無秩破產張良不為家愁思夜來應向月兩行清淚落悲笳
放歌行答袁石民

崇禎皇帝御極初天下一統同車書文章風格變彌上摩光括垢相吹嘘
是時高視有袁子聯社論交道如水敦槃蠟炬走諸賢我亦從君執牛耳
少年意氣競豪放題柱投毫肯多讓黃門給事笑楊雄天祿然藜小劉向
一朝地圻忽天傾四海龍蛇起鬪爭我自長君甘反袂棄諸生
我任湖濱君海角艸木春秋忘晦朔雙魚黃耳到來稀無復當年友朋樂
曾從舟次漫遭逢萍水天涯似夢中半語寒暄乍舉手帆移彼此各西東
脉脉相思不相見空有水心持一片何絲剪燭共西窗話盡十年悲與怵

今日君過直水汀眾人皆醉君獨醒
鬢髮蕭蕭還未白眼光炯炯猶能青
訊君動定近如何君言累比尚平多
嫁女并無主簿犬換書安得右軍鵝
天公相煎更太急郊屋經秋不曾葺
盲風怪雨陡然興遶牀穿漏妻孥泣
破愁止有詩千首一曲歌聲起戶牖
願為痛哭雷海清不願處維呼作友
世人共笑君狂人君或聞之亦不嗔
次山忤時稱漫士魯望逃名號散民
潭上期予采蓮約七月秋風花未落
吁嗟美人來不來蟹肥酒熟堪徘徊

秋夜王減庵網庵顧伊人江位初全過荒廬

溪光入暮小山遮忽聽蘆中笑語譁
載酒叩門驚吠犬移船縛柳亂棲鴉
坐銷紅燭添秋思半側身悄立露華
話到彥先琴瑟冷一時回首淚如麻

顧辭舛舛也音琴

谿南艸堂詩為中州陳簡庵賦

草堂人住浣花溪流水灣環遠舍西
亂後百年喬木在春來一路好鶯啼
牙籤舊拜先朝賜白版新添野老題
日有閒愁伴詩卷數髭燃斷夕陽低

寒溪書屋歌為盛聖傳賦

寒溪先生讀書處近在城南芳艸路
前有十畝之方塘後有精藍老僧住
老僧枯坐斷聲聞時出鐘魚和白雲
先生定靜略相似其中微妙淵源分
吾道于今棄如土碧瓦珠宮遍區宇
同心蕭瑟四三人歎息無徒老環堵
憶昔相逢各少年頭髮鬢髮初及肩
掉鞅文壇鬪飛將縱橫筆落揮雲烟
爾時浮慕僅榮名出門通顯作公卿
博得黃金大如斗徒勞妻嫂羣郊迎
繁華富貴艸頭露毋乃還為識者輕
幸從黽勉濂閩學不負平生被儒服
鵝湖促席討論勤鹿洞攤書校讎樂
對牀風雨一篝燈五夜雞聲常不覺
或如楊子說硜硜或似朱雲折嶽嶽
羨君凝思獨無語千頃汪汪差可擬
三日不見黃徵君鄙吝之心復萌矣
無端四海動干戈斗米平林匝地多
惜陰亦有投檣志報國空成擊楫歌
最足傷心是甲申銅駝荆棘天
白板江南誇扈從丞相何人王茂弘
轉眼神州遂沉陸江頭野老吞聲哭
不見絃歌魯兩生但聞馬上跋遮曲
吾儕相對日慘悽窟室全生理亦足
短褐同為編戶氓虧心身心不辱我
家潭上君寒溪我學耕田君授書
土銜藜鹽聽夜雨沙堤花柳釣春魚
我亦時時乘野漲襪被輕舸過溪上

西隣老圃不相識，曳杖門前頻一望。君能爲我具壺觴，傾倒胸中積翫髒。
擔簦抱籍走門生，爭坐春風如挾纊。若非繁露仲舒帷，定是忠經季長帳。
等閒一任跳雙丸，安問塵容與俗狀。獨憐兩鬢已星星，木榻窮年註六經。
窗外踏殘三徑雪，案頭乾死一囊螢。人生失意恒八九，退谷愚泉古來有。
先生自號爲寒溪，此意得無相類否。蔚村七十二，蓮潭爲有頑民潭。亦頑
今古窮人盡如此，愁殺人間水與山。

諸季心新居落成

蔚村古桃源，儼然在人世。水木互明瑟，菱蒲相映蔽。中有蓮花潭，傳聞七
十二。居民百餘家，老農之所住。雞犬罕入聲，別有一天地。季心何爲者，舍
舊圖新計。不見斜塘濱，兵戈日來去。烟火不得寧，童叟倉皇避。此中獨按
堵，夜戶永無閉。以此觀季心，允矣賢且智。善頌與善禱，冥機以卒歲。

臨安篇

歲乙酉詔封故少保兵部尚書于謙爲臨安伯，遣官祀之。太僕
陳濟生爲之使，未及致命，會國變而止。後九年，太僕追傷遼事。

形于夢寐因賦臨安篇以紀其事遂屬瑚和之

臨安東西三異人，青田一出攀龍鱗。智擒寧庶者，誰子聲色不動兵如神。
伯仲之間見廷益，英謀偉略無人及。當其年少尚諸生，磊落翫髒有聲跡。
秉鉞恒嵩二十載，鷺鷥謠語今猶在也。先入寇鐘，震驚關人失策，勞親往。
英皇北狩，景皇守社稷，爲重君爲輕，力阻南遷，議甫定，士氣人心乃
重振。十二營開德勝門，三千軍提黃花鎮，是謀非自當年始，彷彿公孫歸。
鄭主惟其不急，上皇歸上皇之歸，實以此一朝復辟奪宮門，日有青蠅移。
至尊碧血一腔灑，無地奉天火裏來。忠魂甲申之春陽，九極母后君王
殉宗祏，安得九原公再生。隻手扶輪固磐石，國家多難追前功。世爵恩綸
下九重，使星銜命乘傳去。荆棘銅駝道不通，遙拜西陵淚如霰。夢中靈爽
還依戀，十載重登放鶴臺。風沙馬矢吹人面，讀君詩飲君酒，傷心不忍重
回首。廉頗李牧拊髀思，數奇飛將能容否。君不見笳聲動地，天子愁相國。
倉皇司馬蓋采石，江邊一片月。年年人哭靖南侯。

和錢中野五十自壽詩并序

士遇則視其所爲不遇則視其所不爲孟子禹稷顏子之論詳矣然觀古之隱君子如文通彥方之徒或脫巾解紛或分釜庖以救邑里之命而幼安之在海表也講詩書陳俎豆置汲器井旁以待來者蓋分有限而心無窮勢固不能以自已也蔚村今之桃花源也其中居民百餘戶以船爲家以魚爲食其俗敦龐而淳固以耕釣爲業予僦居者三年始以孝弟力田爲善三約約其村人又一年築岸塍修陂塘禦水患又一年行周急法濟饑者衆利賴之然非予一手一足之烈也黃君幼玉實相予而比年以來則有錢君中野中野舊家鳳里變革之後編芻于邨之大濱躬耕自給暇則與黃髮小兒嬉而遊有不當意則寄情于酒量可容一二石雖極醉必呼其家人煖一大白就牀擁被一吸立盡始就寢所謂堯舜千鍾孔子百觚蓋其信也吾聞酒者天之美祿也其人非高人達士不足與飲酒果其人矣不遇窮愁抑鬱無所俚賴之時與江潭烟水艸木悲涼可歌可泣之

地不足以見酒之妙而飲酒之樂千古之能飲而又適當其時與其地者柴桑一人耳然有男五人不好紙筆遂往掛其懷抱今中野之子梅仙從子遊學聖人之道不苟試于有司而中野亦毫不以介意時時召酒徒飲醇酒醉輒仰天而歌歌已坦腹摩腰鼻息齟然酣臥於七十二潭之上斯其樂已極矣必如之何而後謂之得志哉今歲甲午中野年五十矣予讀其春日自遣之詩曰春鶯移樹弄春陽兩鬢新添半百霜甕牖日遲花影蹙艸堂風細酒杯香身甘貧賤愁中樂老任迂疎分外狂天與閒人閒歲月小砌一葉泥滄浪其一種夷然自得落落然不可一世之狀有見乎辭者予欲爲之進一觴而無以相侑也爰歌而和之

疎葭殘荻漏初陽睡起茅簷薄有霜衝靄青山當戶立帶花黃鳥過谿香
陶潛止酒貪逾劇阮籍窮途老更狂願得江潭同醉醒免令漁父笑滄浪
讀史詠張世傑事

一尺波濤一尺丹十年報國奉心肝
盲風恠雨蛟龍泣剩水殘山日月寒
橫海樓船千里震磨厓詩句萬人看
武功應記當時寇只是將軍不信韓

確庵文集

卷之三上
詩歌

玉山集 起乙未盡丙申

題陸翼王菊隱圖

短髮垂垂不整冠陶家籬下獨盤桓
歌成白雪當秋暮人對黃花共晚寒
亂後鄉關雙袖濕夢回心事一燈殘
可憐名士推江左祇許風流入画看
乙未春盡日同李映碧廷尉葉白泉水部冒雨尋山次梅仙韵
是物關愁緒春歸雨一艇蛙添行際浪
鶯失踏殘花度嶺陶輿怯衝泥謝屐
斜隔溪烟火暗人語辨山家

宿友人齋感舊

一別如萍兩鬢宜柴扉風景故依然
種梅老作年年雪栽柳陰成日日烟
何處碧雲催牧豎幾家紅樹襯漁船
憑君不盡尊前意定許劉伶荷鉢眠
黃暉六吉州生日詩四首

昔日才名衆所推一官正值亂離時
吳山楚水傷心畫越島江花濺淚詩

陶令折腰終寄傲胡公勵節豈求知而今併入槐根夢繡佛明燈炤髻絲
去國身如一葉輕十年不字守吾貞衣裁荷葉騷人志筆採松枝處士情
天道豈知弓並曲人心終似坂難平我來每爲開尊酒一笑花前醉月明
印溪江夏素風長父女兒孫笑滿堂人物傳中推叔度晨昏牀下拜文疆
黔尉松遺家舊有書千卷祭酒今堪望一鄉白使君推時向平蕪少人處
小拖印杖立殘陽

師友君臣吾道窮雲天瓶水老僧同六窗那許獼猴入一枕從教蝴蝶通
人定月殘香未冷詩成花落雨初紅燒芋夜到山中客不是支公卽遠公

癸巳歲暮長洲李如石使君見枉于子晉葑溪艸堂余報訪于蕭
寺感懷往事流涕慷慨日月如流已再易期矣追憶其語成絕句

奉贈

積雪空庭印屐痕門生持刺刺無文布袍皂帽渾閒事不道當年舊使君
沈雲老葑水邨田惡歲那堪佐橐餗並廢墨池都不管更無人贈買文錢
碩鼠貪饕猛虎殘紛紛羣盜遍江干綠林也解知忠義却問新官與舊官

曾記峩峩奉詔來漢家天子御平臺就中請劍成何事博得秦淮衣繡回
白帝黃牛萬里賒十年遷客老無家啼殘夢後春風鳥落盡愁中夜雨花
襪被輕寒寄一巢寺門魚磬老僧敲樵蘇不費清談永恰似前人杵臼交

簡凌約庵

漁唱前村醉綠莎斜川風物近如何板橋霜滑行吟緩竹屋春深坐隱多
花出樹頭隨鳥墮人經浦口卸帆過遙知曲誤頻回首未許周郎獨解歌

寄馮定遠

綠陰如幕透牆圍小院春深晝掩扉一樹啼鶯花自落無人知是謝玄暉
和子晉贈鷗

零亂芙蓉夕炤微羽毛如雪點烟霏慣迎書舫隨風任閒逐漁罾帶月歸
避地祇知秋水樂忘機真與世情違無端乞食人間去笑殺鸕鷀不耐餓
請歸玄菘傳陸履常事有感兼弔于垂先生

一門風節與人殊先後淪亡歎恨俱絮酒尚虛徐孺子麥舟可有范堯夫
功臣斷碣今何在劉翽翽義士遺書定已無飛當代文章誰似汝好傳者

舊到吾吳

次韵陸彥修生日

虞夏神農事渺然路衢日斷醉人眠
攤飯一牀當午後灌花三徑趁秋前
文姬未贖明妃嫁獨守空閨覺汝賢

中秋葉九來招飲得秋字

雨過江城一片秋清光尚阻醉人遊
已驚出海雲霞動未得當空鬼魅愁
汝社有期皆晚信玉山無客不風流
遙知樾閣唇亭畔叢桂生香到上頭

同湯公綸陸桴亭看楊林古桂

天香十里若爲迎非是無材老半生
綠葉動雲秋有色黃花落地夜無聲
雀穿曲榦和烟立人臥橫枝待月明
勝事只今能得幾笑沽村酒醉班荆

白璧

白璧誰云點點瑕青蠅多事枉相加
曾參未免三投杼馬援何曾載一車
但得酒星明似月從它箕舌大于瓜
封姨尚有蛾眉妬落盡枝頭一夜花

贈王元倬追和中庵韵二首

雪客波仙并一身全將辛苦答彝倫
空山花落年年恨故苑鶉啼夜夜春
秦地關河天有醉漢家宗社國無人
相逢盡說陶元亮忠孝如君始是真
何處堪巾花外車江湖天地老蘆盧
絕交論著陽狂日誓墓文成痛哭餘
萬事雲烟悲短髮十年風雨抱殘書
明燈落木蕭蕭夜詩卷言愁正起余

懷李映碧廷尉

一別雙丸去似梭涉江風物近如何
田園蕪廢身名重書劒飄零著述多
落木怕聞蟲夜泣微霜愁見雁南過
遙知相國祠堂裏祭告纏綿痛兩河

次韵得閒廬詩

矮屋雲深綠水灣露華皴竹老成斑
門開柳色春風裏人在梅花夜月間
高適有年吟興發尚平無累道心閒
全生養拙于戈際未許移文笑北山

霜葉

晴光散秋暮天地嗒然真樹老將至
山山紅又新有聲宜獨夜不定似
羈人莫歎成搖落含風別是春

寄懷攝六

中原河嶽異回首事如麻茗椀消秋思魚聲洗暮笳杖隨溪上月屐印雨
餘花料得東籬下持螯酒正奢

村居卽事

颯沓涼飈萬葉飛蘆花如雪炤柴扉七歌欲絕腸應斷百鍊將成事已非
南浦犬聲漁網集西山鴉背夕陽微沿溪一棹咿啞急應是兒郎得酒歸
香雪藏詩

吾友王子春別號石隱通于文字之學著六書論正其說出漢
唐諸家之上近預爲生壙旁種梅花百株謂之香雪藏作詩自
述因次其韻贈二首

秦斯周籀等閒身叔重遺文又一新雙髻半因傷亂白十年都爲著書貧
詩成石壙高人趣香滿孤山處士春生便埋名死埋骨乾坤何地不風塵
百年幾見百年身一歲驚看一歲新大塊有生必有死達人憂道不憂貧誰
知在昔陶元亮便是當今王子春千載風流弔君者玉壺斗酒酌香塵
馬鞍山百里樓晚眺

倦閣起悲風憑闌思不窮一城秋水際萬木夕陽中兵氣連滄海人烟混
太空感時徒作賦王粲豈英雄

靈岩槩庵和尚故黃門魚山先生也崇禎末直聲震天下今逃于
禪杖錫至玉峰予拜而見之因成四詩奉贈

已無姓字挂人寰尚有聲名重泰山萬里一身餘涕淚十年雙屨老閒關
龍腥怪雨江城黑鴉背殘陽木葉斑爲問天涯幾知己可能留得舊殷頑
曾爲修竹上彈文又見寒松倚暮雲故國山河愁裏夢異鄉鴻雁定中聞
令威未化遼東魄伯樂能空冀北羣我亦欲從飛錫去紙錢杯酒酌韓墳

靈岩山北

圓顱方袖朔風寒乞食人間下戒壇儘許營齋來上座誰云饒舌怪豐子
乾坤有意爲芻狗日月無心似跳丸莫把離騷付江水還留楚調與人看

詩故云

硯石山頭二井空吳王曾作館娃宮銀牀素綆銷沉久青艸垂楊感慨同
法鼓三千存禮樂輪珠百八老英雄攢眉休笑陶元亮止酒何妨對遠公

丙申元旦步大人韵同遜邀兩兒

條風扇暖斗初旋消息江梅取次傳菽水笑添鳩杖酒桑麻判老鹿門田
迎神社廟來村鼓罷釣漁舟繫野烟聊寫陶詩掛蓬戶不爭艷冶入新年

過湖上次韵訓潛

抱籍囊詩過野堂蹴天高浪動湖光春風鷗鳥幽人瀨夜雨梅花處士莊
顏色看來還似月髣毛別後各如霜借書曾有荊州約准擬明朝載滿航

立春日同梅仙歸村舟中次梅仙韵

寒沙雙岸白雪掩殘苔乍霽山先見初春鳥未來竹鑪沽酒醉漁艇載
書回小犬眠花影柴扉叩始開

賦得人日題詩寄州堂次蔚庵韵

何許相思天一方蒹葭十里動溪光餅餘竹葉時時醉雪近梅花片片香
細柳有風春駘蕩殘燈無月夜淒涼破笛喜得停雲句人日題詩寄州堂

次韻九來繭園十咏

家大人遜邀同和家君作見別集

大雲堂

面崗背竹曲池環清風爽氣日夕自佳

曲巷埋名迥虛堂日夕開簾疎花氣入榻靜鳥聲來客有青雲士家多白
雪才坐深忘漏永零露下莓苔

唐亭

形如上室穴其四旁梅花掩映雪月皆宜

愛此唐亭僻梅花靜倚門無人如太古有月共黃昏山凹生雲竇溪平露
雪痕于時何事樂一卷對清尊

小有居

忘情思草木細與素駝謀移竹宜乘雨鋤蘭不待秋名花分上苑異種自
仙洲蔗境吾生足浮名水上漚

據梧軒

小樓數楹下臨曲渚柳風拂拂画槩時來檻外桂花鬱然葱

舊致足樂也

小樓幽眺獨片片落霞飛入夜琴絲潤先秋桂馥微百蟲依火亂一鶴向人歸忽見塔前月光華上板扉

霞笏

土岡小而高夾以深池復側一山相望成勢松壽春然四下南岡着小亭如笠可以箕踞中秋待月此地最勝

携筇亦可入何必整車巾松籟時時雨花香日日春楊亭多載酒蔣徑少行人卜晝常兼夜風光幾度新

綠天徑

竹有萬竿蟠窟三畝高下其徑入者如步山蹊

未必分蕉影依然共綠天引颺涼小徑漏月照斜川外直看誰似中通覺汝賢若吟正相倚淒絕一聲蟬

樾閣

遠寺吐朱閣春潮浮綠烟顧逋翁得意語也閣外似之

閣外幽芳合隨時樂不窮葡萄綠架綠枸杞上墻紅鏡柄浮生托奚囊快友同閑來喜覓句得意似逋翁

煙鬟榭

去綠天逕數武環以高岡止水一泓深碧可鑒泉聲屈注不絕白泉自號謂此也

源頭有活水積勢小成湍玉碎流荒榭珠明濺淺灘亂雲生曉樹層雨捲秋巒三寫焉烏誤攤書仔細看

濠上

城內諸河盡淤獨園東一帶水從新洋江來曲折清深磊石為難望薦巖寺無一牛鳴也晨鐘夕梵與牧唱樵歌相和擁竿其上可以適志

柴桑喜高尚地以此心偏漁集烟中網僧歸雨後天鶯聲春貽蕩花信日周還兒戲真如蟻槐根夢又圓

舒嘯

千章古木間以老松曲江云天清風雨間差盡其勝此隣墓
物以亭目之如爲已有

置身當百尺東望女牆低樹杪穿孤塔溪腰俯一犁野樵愁獵騎村犬吠
征聲無恙春風柳關關兩個鷓

附九來原詠

大雲堂

大隱卽人境書堂此日開竹聲千個合荷氣百重來方丈凌雲構嘉賓
詠雪才清涼俯衆國花路疊莓苔

唐亭

好事問山水邇來春閉門一亭風澹蕩百樹月黃昏鶴夢通幽響雲聲
消舊痕何人東閣上獨寤老清尊

小有居

衆壑春流澁爭爲洗耳謀桃花真避世福地不知秋幽絕成孤島微茫
見十洲百年高枕外何處著浮漚

據梧軒

畫閣垂春望喃喃燕學飛棹歌花外轉琴語月中微惠子聊深坐莊生
有夢歸頰占秋桂影叢綠映巖扉

霞笈

五粒涼風裏翛然脫角巾雲山收一氣花柳入殘春自在羲皇夢何知
晉魏人平生多漫興詩句媿清新

綠天徑

種紙古人事此君亦綠天琅玕分夏簟風雨卷晴川屢洗應關癖獨醒
漫避賢徘徊恣幽趣薄暮帶新蟬

樾閣

寺鐘楊柳外極目况無窮借樹周遭綠評花次第紅何人肯一顧吾道
許誰同晞髮悠悠者前身號放翁

烟鬟樹

泉從不意得日夕響奔湍以鶴守三徑與鷗分一灘清幽添雨夜迢遞

挂烟巒品定無潮白年年雪後看

濠上

輞川南北垞何似此幽偏蟬起夕陽樹鷗喧春雨天滄浪歌未杳湖海
客應還夜半鐘初到前林孤月圓

舒嘯

離立萬松樹野墻不礙低如潮來晚磬及雨放春犁雪路增樵採風聲
隔鼓鼙正堪朋酒會並坐數黃鸝

附遜兒作

大雲堂

大雲隱者路中有草堂開移樹黃鶯亂穿簾紫燕來酒依金谷數文聚
兔園才時覺涼颼入蒼筠覆砌苔

唐亭

亭外香風好春來長閉門高人時白醉冷月欲黃昏石際垂冰筍堦前
破屐痕花光深焰處匡坐獨成尊

小有居

人間多碌碌總爲稻粱謀靜聽催詩雨閒忘入座秋樹深蜂聚壘水淺
鷺停洲何必仙源好浮生一泡漚

據梧軒

搖曳林烟合時時一鳥飛小樓人語細孤嶼月華微客爲彈琴過家從
種秫歸閒尋無隱義香氣遶朱扉

霞笠

前代衣冠古芒屨折角巾露深三徑濕艸發一庭春幽澗夜浮月野禽
朝喚人小亭眠覺後松子墮簷新

綠天徑

蕭蕭篔簹帶雨入夏忽參天積翠遮斜徑重陰卷小川孤高桑苧叟曠達
竹林賢箕踞無餘事頰聞隔浦蟬

樾閣

鐘聲何處出凭閣思無窮四壁山光翠一簾花氣紅暮帆遠浦盡春社

幾村同放脚東臯外舍喃有醉翁

烟鬢樹

何人能樂水不息自成湍灌藥雲生展亭茶鶴在灘渡頭疑夜壑天外
見晴巒詩卷兼庾鮑年年借客看

濠土

忽添濠濮想心遠地爲偏魚戲銜池藻鴻歸摩雪天農歌衝霧出漁唱
載潮還栩栩聊乘化莊周夢欲圓

舒嘯

借得隣家樹移來翠蓋低可無表聖筆却有子真犁夕焰驚魚鳥春風
送鼓聲幽人長嘯罷嗣響到鳴鸚

附邀兒作

大雲堂

無人深巷曲忽扣板扉開本自桃源路漁郎何處來堂居千載士座納
一時才奇字爭前問庭堦破綠苔

唐亭

唐亭有佳趣風月滿吾門樹色忘今古花光失曉昏看雲生石罅聽雨
走溪痕坐到無言處時時對一尊

小有居

未與人間隔聊爲世外謀攤書悲楚漢玩艸紀春秋道欲存三代人疑
在十洲滄桑何所似舉目感浮漚

據梧軒

碧空絃夜響忽動綵雲飛憑檻凝眸遠支筇得句微雁乘星影度鴉帶
露華歸叢桂天香發秋來長掩扉

霞笠

居然錦里跡遺裏舊時巾鶴唳無眠夜鶯啼有脚春松高能答響月白
最宜人長恐年來事青山與世新

綠天徑

萬綠中三徑徜徉別有天新篁瘦瘦石殘葉下斜川節勁高千尺林成

隱七賢臨風正晞髮微雨響寒蟬

樾閣

平楚蒼然際憑高望不窮
柳分雙岸綠楓落半江紅
風雨愁心共山川
變態同宜詩并宜
畫天地一漁翁

烟鬟榭

一泓止水淨何處起風濤
世故三千客人情十八灘
落花殘夾雨歸鳥
倦尋戀不定烟雲意
開襟日日看

濠上

忽添春雨後野漲連東偏
僧唄聞前寺漁歌起暮天
地幽無客至江濶
有人還俯仰能遺世
孤心月共圓

舒嘯

孫登容一嘯回首亂雲低
蕩子移春舫山農放晚犂
樓頭催怨笛城角
動征聲醉倚春風裏
鳴聲遶樹鵲

元夕爲邀兒行冠禮口占示之

成人在弱冠汝年已近之
百拜思宗祖三加習禮儀
童心從此盡古道以
爲期老我嗟遲暮無聞悔
莫追

映碧先生見遺地圖仍用前奉懷韵

圖画山川感慨多邊陲風景近
如何入關無復蕭丞相聚米空思馬
伏波
兩戒一江橫似線九州五嶽小
手螺錯疑留守魂歸夜風雨聲聲喚
渡河
春家皇士齋遇顧茂倫吳赤溟沈雪樵
徐察之施又王瞻拜先
帝王遺像已而皇士出表
介人送家孝則詩暨茂倫又王和作漫

賦一章紀事并示介人孝則

葑門橋頭春水曲葑門道上晴烟綠
兄弟相思歲月深一朝相遇驚相囑
斗酒金尊話正長疎簾日影移清光
插架圖書炤毫髮
叩須吾友來登堂
登堂傾蓋吐肝膈
跡寄繡塵心陶石
茶竈書牀夜雨舟
尊羹鱸膾秋風客
吾儕不必恨長貧
投老天濶學避秦
識兆食人當甲子
運逢薄命降庚寅
世情翻覆如蒼狗
得喪窮通無不有
天寶餘生我尚存
永嘉流禍君知否
誰將朋黨誤朝廷
誰爲身家欺我輩
誰使干戈滿地生
北都煨燼南都走

龍起空聞三百年土崩瓦解言之醜嗚呼志士多苦辛丹青一卷傳真人
真人颯颯悲風壯前列王侯後將相隆準重瞳氣象殊豹頭燕頰精靈王
采石磯頭奪槩容鄱陽湖畔張弓狀拜舞瞻依喜不勝泪痕早濕青衫上
西田日暮各歸家袖出新詩尺幅斜自是河梁離別曲珠爲咳唾筆爲花
九峰峩峩三泖急不歌乘車歌戴笠調高和者較偏多堪嗣玉山州堂集
何時載枉哨帆輕同岸紗帽望月明石鼎聯成彌道士江關吟遍謝宣城

江上拜江國海國二吳公祠

百戰君兄弟孤城重帝京到今江上水猶作寶刀聲

弔戚舍人宅

文華殿中書舍人戚勛號羽明乙酉城陷自書年月姓名于壁
闔門焚死妻侯氏妾程氏葉氏梁氏女三姐八姐九姐皆從焉
計死者二十一人堂列男女兩棺蓋燼中餘骨也余偕潛在梅
仙拜而哭之

白骨埋青艸全家烈焰餘夜來墻上月光炤數行書

過黃博士故園

黃毓祺字介子巳丑歲庾死金陵獄中著遊仙詩一卷今其故
居已爲僧舍改名萬佛林矣

讀君遊仙詩一泪成一字可憐義士居竟作浮圖寺

閏端午

又見菖蒲泛綠醪滿城簫鼓画船勞游人自惜歡娛晚兩度江干弔楚騷
拜季子墓次壁間張正見韵

季子空祠風流自不移山如相讓色樹老獨醒枝旁有奇樹能醒人醉地脉迴申
浦天心愛孔碑雷震字班荆齊酌酒此意許誰知

申之水三章題季子廟傲王元吉體有序

丙申孟夏偕潛在梅仙泊舟芙蓉城外每遇風日晴美則登君
山瞰長江歷覽鵝鼻嘴大小石灣諸勝過劉伶巷上杜康橋訪
伯寧荒塚干城濠凡吳氏二侯祠戚舍人黃博士廢宅無不歌
呼而憑弔焉已復求季子墓而往拜之攷國初王逢嘗賦申之

水詩以題其廟其序曰廟在申港大阜上去阜二十餘步有田二畝名池子區相傳呂舍人花園也呂氏宋末官閤門舍人方治園時夜夢神告曰吾季子也汝將鑿池處吾實葬焉呂鑿池及土深果見巨首圍五尺許始驚焉亟移瘞今廟後至正戊子歲予躬謁廟下為賦三章用追弔云詩具存梧溪集中潛在簡示予屬予做其體同賦其事

申之水何湯湯登君子墓爰薦馨香嗚呼讓國同子臧太伯虞仲遙相望十字碑題炤千古胡為宋儒輕訾量君不見龍行虎步作天子廷美德昭不得死

申之水何湜湜登君子墓爰薦黍稷嗚呼四月十二日肆吁男婦如雲走如織此豈浮圖老子宮神所憑依將在德君不見梁公淫祠毀無數廟貌歸然永如故

中之水何源源登君子墓爰薦蘋蘩嗚呼呂氏空治園葬欲速朽前人言一杯黃土二千載豈有巨首仍軒軒君不見漢寢唐陵骨不保孤臣涕泣

冬青道

子晉重建破山寺空心亭即用常建詩邀同社分賦四十首樹碑亭左得晨字

曾依潭影宿疎磬報清晨壑靜龍身蟄僧閒虎跡親高林仍炤日曲徑尚通人興廢增悲感題碑又一新

皇士前五圖詠

皇士太僕叙其生平往蹟分繪五圖范質公黃石齋楊機部諸公江上講易一伏闕請文莊卹典二謁天壽陵拾松子歸成樹三視馬滁陽四乙酉奉使晉于少保臨安伯爵五一時多賦詩以紀其事者余因作絕句五首

回首江頭受易年已騎箕尾笑歸天羹墻倘許重相見定授潛龍第一篇萬戶千門響玉珂小臣曾此乞恩波御溝流水依然在半作他家飲馬河天壽峰高十二陵幾多狐兔炤魚燈凍雲北望愁千疊欲哭冬青恨未能青絲玉勒踏春風滁上山川好句中明眼似君今伯樂管教一過馬羣空

白晝兼鬚奉使臣關山戎馬淚沾巾只今風雨殘燈夜尚有靈旗入夢頻

皇士後五圖詠

太僕又作後五圖坐禪一高臥二擁妓三觀瀑布四指揮軍政
五太僕雅量高致槩見于此余亦作五絕句題之

春鳥空啼曉樹聲花開花落不關情閨中只有興亡感坐破蒲團銷不成
多難乾坤一腐儒十年風雨臥江湖希夷高枕吾家法可有華胥到夢無
何許蕭郎白鼻騮風流春色惱人家曾聞閨闈尋春日不見如花祇見花

上曾納姬不遇以重
價買茉莉歸故戲之

翠嶂遙從天外開飛泉百道下如雷何當化作中山酒一鼓鯨吞萬萬杯
百萬貔貅指顧分他年樹下識將軍誰知蓋代文章手露布磨厓總是君

和皇士揜關詩

爲貪枯坐好盡日揜雲亭銷暑看雙劍忘年注六經榆陰遮戶綠螢火入
簾青冉冉流光去殘花下一庭

秋夜懷家鶴客時有許以陰事者

久知肥遯作冥鴻何事人傳觸網籠中散有詩傷命薄步兵無淚向途窮
亂離萬事成蒼狗慷慨孤心感白虹秋夜懷君頻坐起小窗風雨一燈紅

訪無寓上人

小通畧約處峭蒨褱禪關溪冷泉初引畦深艸未刪蟲鳴花外雨人立樹
頭山別去誰爲侶涼颺月一灣

哭毛補仲

落木蕭蕭作雨聲魂遊應向月華明青山舍北平生友綠水門前舊日情
退筆滿牀人不見殘燈如夢鳥空鳴比來頗學慵騰睡哭汝重教恨未平

七夕

銀河如練入秋明烏鵲勞勞駕未成天上相思應有恨人間離別豈無情
所聞

梨園子弟奏新詞越女吳姬舞柘枝尚八黃羊八西八前若個史騾兒
金鶴翀侍御死節詩

驄馬埋輪烈丈夫曾將諫艸伏廷蒲党人碑下劉逵奏儼椒安上門前鄭

俠圖疏陳一劍更難君父後保定城守時全家無媿聖賢徒死斷挑燈細讀徵君傳尚有程嬰抱兩孤公任肖孫

大雲堂即席次九來韵贈家藹公

瑟瑟涼飈墜葉鳴天涯尊酒坐班荆蹉跎風雨存吾道離亂山川仗友生一曲羽聲來易水中宵劍氣出豐城玉峰高會予偏晚慙媿風流顧阿瑛九日瑞五攜尊招同二勝德下致一湘九令則九來登山作

木落秋高破帽同黃花尊酒夕陽紅別尋曲徑無人處團坐深林古墓中隔岫不知誰弄笛舉頭忽見月當空醉歸一路狂歌去野艸寒烟遍暮蟲

病肺

病肺秋風臥一廬髮毛冉冉白何如函關枉著王符論報國空存葛亮書土銜荒寒鳴竈馬苑牀甲濕走衣魚長庚夜夜光如月萬事頽然一醉餘

送翼王歸粵

梅花燈火對深宵門外西風利似刀今夜角聲催舞劍來朝木葉送歸橈幼安遼海人依舊臯羽西臺怨未銷同是天涯離亂客幾回腸斷練祁潮

確庵文集

卷之三下

婁江集 起丁酉盡戊戌

丁酉春暮送江愚庵燕遊二首

鳥啼春盡水悠悠撲岸楊花送客舟不奈別離宜醉酒曾經征戰莫登樓夢來尚作劉琨舞秋到還同宋玉愁一望中原思無限廿年全盛此神州燈火連宵舊日情當時天下尚承平書成木榻花初落劍舞郊檐月正明已屬古歡難再得不堪人事日紛更憐君雙袖辭妻于千里迢迢作遠行

送王懌民之燕

薄霧輕烟逗午和送君南浦意如何玄融師弟圖書樂愚庵行僑札賓朋縞紵多故國夕陽帆外見帝城春樹馬頭過刀環定悞深閨約莫聽高樓子夜歌

吳玄思兩謝徵書賦贈

蒼蒼松月下東臯空負丘園貴帛勞馬隊校書卑祖謝芝山高枕失蕭曹

狂能中酒三年醉老愈工詩一世豪非是烟霞成痼癖漢家宮闕久蓬蒿
送王登善謁選

碧溪一路聽啼鶯無限春風在此行救世定存三代志窮經休負十年情
風流人傑推王猛文獻中原屬許衡慙愧故人空老大祇將饑餓答平生
閉關詩

酉春三月坐虹友齋頭雙扉深鎖聞無車馬之跡吟詩讀書怡
然自樂古人所謂郭郭之中曠若郊野者也爰書別有天地四
字粘諸壁間因成一律寄興

橫木爲關當邵窩天根月窟此中過空庭夜雨添青艸瘦石春風長綠蘿
吟罷不知花片落靜來還畏鳥聲多時時有夢歸潭上釣艇烟深背一蓑

簡歸玄恭

淮陰陳確庵白門顛磨士瓠瓠泥良玉渭水濁涇水耳食與目論人情每
如此近聞大江南亦有兩歸子一歸性簡傲臣朔饑欲死一歸袖圖書醉
飽崇川市我還問歸子歸子果誰是

簡黃攝六

鬢絲初白佛燈紅回首當年事事空花落花開三月裏人歌人哭十年中
宅邊綠柳思陶令洞裏丹砂問葛翁時攝六學長生術又見榆烟近寒食健兒驅
馬鬪春風

李灌溪侍御家定齋太僕百齡合壽詩

同是孤臣旋白頭江東人物舊風流惜模天下思元禮文範吾家重太丘
後甲先庚齊得戊灌溪戊戌定齋戊午一時借隱足千秋他年好記遺民傳瓜落青
門兩故侯

重陽後一日舍綠堂吟社初集袁重其索賦

黃花絳葉送重陽冰雪文人聚一堂有國共牽庾信恨無冠誰笑孟嘉狂
老知節物驚心易愁覺烽烟入夢長稍喜荊門表孝子年年雙鯉乞詩忙
和袁海叟白燕三首

昭陽宮闕是耶非昉昉樓臺夢已稀玉樹但聞花外語晶簾難見月中歸
菟姑冰雪疑爲骨京雒風塵未化衣今日畫堂誰舊主肯從簷下傍人飛

零落香泥故壘非
玳梁珠箔遇應稀
獨留潔白遲春至
爲愛空明入夜歸
掠去不知花似雪
舞來還借月爲衣
自憐未是尋常色
頻向青山襯處飛
墮簷如雪又成非
一水空濛整影稀
圖画定依梨樹立
夢魂長遶玉釵歸
蘇卿塞外還家髩
陶令門前送酒衣
訴盡興亡無限恨
春來秋去故飛飛

次韻董得仲詠柳

江南三月亂鶯時
怕見千絲與萬絲
馬上郎君回首淚
閨中少婦斷腸詩
眉因恨鎖眠偏早
腰爲愁纖舞故遲
記得漢家霑雨露
年年花遶鳳凰池

和陶三首

形贈影

相須雖最殷
相遇有疎時
賢哉君于我
日夕同所之
膠漆與水乳
綢繆不相離
如茲少小遂
投分沒身以爲期
因依四十載
遙遙使人思
君應共我老
撫運興悲
而我髮似瞿曇君亦不吾疑
顧壁各相笑
嗒然無一辭

影答形

世人皆愛巧
惟君獨守拙
我拙亦如君
邈與時好絕
但知審邪正
豈能辦

容悅蕭蕭風雨夜
疑若暫乖別青藜
一以然我跡仍不減
君賤我不寒
君貴我不熱
君本凌霄姿
有願終當竭
我其從君遊
方軌無優劣

神釋

三才人最靈
厥義古今著
譬猶鑑照物
實以光明故
自從有生來
與君相麗附
我爲渡君舟
曾聞真誥語
又云車從馬
車敗馬何處
君行由我行
我任非君任
要有立命術
騰化何足數
交梨與火棗
只在此中具
夷齊雖餓死
不朽千秋譽
鼎鼎百年中
有時別君去
得固不足忻
失亦不足懼
反躬良其背
動靜兩無慮

蘇臺懷古

吳人歌舞越人愁
轉眼蘇臺見鹿遊
洲上百花還有恨
偏教西子占風流

觀耘

赤日蟲蟲向地燒
項愁成稿背愁焦
晚來薄醉三杯酒
爭唱吳歌細似簫
高彙旃提學于墓
旁築石屋有詩紀
事奉和二首

鑿屋空山傍故丘
等閑心事係千秋
鳴泉暗寫孤臣恨
落日平添孝子愁

萬木雲邊見高鳥五湖天際辨漁舟無窮事業歸書卷玄晏先生未白頭
世事今如折足鐺誰爲吾道作干城一祠早拜楊中立五嶽還從尚子平
絕壁翠遮黃犬吠亂霞紅照碧泉明我來策杖尋蹊入只向漁人問落英

揖山樓月夜觀荷有序

丁酉季夏東郊池荷盛放白公舉香山之會王子續蘭亭之遊
于是載酒揖山樓中招集同社賞花賦詩斯時也薰風南動圓
曜西沉青山與白月交輝螢火共禪燈相亂酒具聖人之德花
開君子之香遂乃分硯劈牋各伸雅志燭痕滅而金玉鳴鉢響
流而珠璣落筆不停綴文不加點以今揆昔殆有同情諸兄皆
人之表儀國之俊傑涉斗牛之分野山川助其壯懷更陵谷之
屢遷今古資其憑弔固宜登高能賦觸物成吟而使君以政事
之餘旁通風雅心閒手敏落筆驚人康樂出守海郡池上有登
樓之篇知章屏居鑑湖中流有采蓮之曲豈非天挺之姿秀出
人區者哉予以負疴兼旬辭不獲命勉應賢主之招妄廁良宵

之席披靈均之芰製岸襲美之紗帽叔夜之迂狂自如淵明之
謬誤可恕顧不自揣量輒以糠粃先導已而復成投贈四首并
諸名篇彙而錄之都爲一卷將攜歸蔚村誇于田夫樵叟之前
亦以見太守之風流爲一時之勝事云爾

圓碧輕紅漾一池樓臺倒影見參差杯湖人重非干進金谷才高各有詩
山勢忽移知月近花香徐動覺風吹使君心地清如水野鷺沙鷗定不疑
卽席贈白使君

訟堂無事使君來對酒看花鬪麗才月帶艷光搖竹樹風飄香氣入樓臺
綠谿画舫雙鳧近隔岫禪燈一磬催幾度揖山山不語倚闌凝思獨徘徊
贈主人王周臣端士異公

猶是當年綠野堂湘簾半捲藕花香青絲繫艇人如玉絳蠟籠紗筆滿牀
客醉已成王粲賦主歡重進孔融觴脫冠露頂車茵污定笑狂生老更狂
又贈蓮花

清光斜映一枝枝無限含情祇自知騷客薄醒秋思後美人初浴晚妝時

圓珠的的迎風碎墜粉娟娟帶露垂七十二潭吾舍在亂紅零落繫人思
次韵攝六西田汎月詩三首

十里波光月在田空明如雪照嫵娟隔林吠犬驚燈火出水游魚聽管絃
但覺人間無曉夜不知天上有神仙白蘋紅蓼漁眠穩一鷺離磯立釣船
築成場圃納新禾積雨平疇受月多到處樓臺永作國誰家池沼錦爲波
青山雲淨高秋見翠羽花香靜夜過不是醉吟當此夕悶愁何事解消磨
乍看如烟近却無渚清沙白兩模糊忽聞風入蘆花亂不待霜催木葉枯
甲煎暗招雲外鶴洞簫聲咽樹頭烏輞川賢主今摩詰定有秋心入画图
通暉樓詩爲松陵沈建芳作

危樓百尺五湖東亂後天涯極目同宛馬曉嘶芳艸路杜鵑春恨落花風
有無人物菰蘆裏多少山川鼓角中解道仲宣工作賦愁來閒凭夕陽紅

丙園精舍與天御圍棋

風人疎篁午磬遲罨恩紅漏晷潛移山僧削得瓜如雪坐樹閒敲一局棋
秋孫不應科舉書此懷之

壞屋荒郊草滿蹊野花片片踏爲泥青山盡處秋雲合白鷺來時早稻齊
消渴嬾題司馬柱清齋貧欠太常妻牀頭書劍渾無著四壁寒蟄切切啼

懷定齋

曾經離亂愛逃禪梁棟雲生近學仙秉燭春宵光似晝函關秋夜靜如年
蛟龍有日終爲雨雞犬無心錯上天欲共一樽開笑口庾樓明月幾時圓

山南書閣葉九來葛周艸送酒

北窗高枕見青山不盡烟雲自逞還磬報午晴僧飯熟棊敲秋雨佛燈閒
沙明霞外鳥千樹人在牆東水一灣忽到白衣來送酒陶潛從此破愁顏
繭園夜坐卽席和白泉先生

小山秋更好團坐一亭陰堦下聽流水堂中橫素琴微雲生戶牖涼月動
衣襟何處天香發無言此夜心

同虹友遜兒夜話用放翁初冬韵

疎幕迴飈動月光皎于白日冷于霜蕉吹敗葉頻疑雨菊倚寒枝尚抱香
愁聽亂離烽火逼細論人物酒杯長桐江釣客吳門尉不遇真人髮已黃

壽師母趙太夫人追念業師我完先生有序

吾師我完先生以文章學問名滿海內海內望之如山之有嶽水之有海莫不擔甕抱籍走千里而幣見以得與門牆為幸也瑚年未弱冠卽偕江君士彥陸君世儀王君揆撰同受經于先生之門時先生家食貧又兩尊人在堂旦暮饗飧常不繼吾師母太孺人時出其泝澣織紵之資以佐之歲已卯先生登賢書然布衣疏食如故太孺人安之無纖毫非分之望也先生性亢爽鄉黨間或有不平則義形于色挺身而鬪一切米鹽瑣碎非其所屑故常遠游江北不問生產數十年間先生得讀書勵行寬家室之憂者太孺人內助之力居多酉戌之交先生避于膠邑之槎溪瑚與天御託跡任陽先生徒步造訪彈碁賦詩流連三日夜始別去其于行也諄諄欲求一結隣之地如潯陽三隱故事亡何遂及于難而忽忽憂愁抑鬱以歿今歲丁酉太孺人年六十屈指計之已相去十餘年矣向使先生之志得遂而望

衡對宇杖屨無恙今日者度阡越陌修隻雞斗酒之歡豈不大樂今乃不見先生而僅得壽吾太孺人其為可感也已于是乎系之以詩

登壇獨立是人豪盡道龍門聲價高橋外衣冠觀聽盛閣中燈火校讐勞亂來踪跡思梅福老去文章續謝翱今日升堂拜吾母草深門巷雨蕭騷
戊戌春贈姚鑑三生還

自古誰無死生還亦偶然寤愁與我共蒙難感君偏木以霜逾老金知鍊更堅天心今夜月如為故人圓

春盡日病中自遣

昏昏如醉復如疑藥裏書籤強自支但有暮愁微雨後更無春夢落花時學仙爭得長源骨客有勸子驅鬼空吟子美詩九十風光容易別祗添雙鬢白于絲

次韵白林九明府東郊芍藥

紅影翻堦香滿枝含情無限信風吹偏迎晴日生搖蕩不與春光管別離

名亞花王猶有恨人疑仙窟可無詩停杯早見鈎簾句太守風流話一時
客秋與家定齋有洞庭之約而以病不能往讀其遊記歷歷如在
目中今歲四月遇定齋于玉峯同過婁江連宵對榻忽又別去予
尼之不得云將歸而閉關銷夏成吳中文獻一書其好學如此予
乃書閉關學道穿榻讀書八大字并成長句一首以壯其行因邀
同人共作

天涯兄弟對床艱忽漫逢君綠水灣豪氣未除書卷在高冠無恙酒杯間
到來謝屐方乘興歸去楊亭又閉關後會相期何處所五湖烟月洞庭山
聞隣郡三月十九日事

置酒高臺幕四垂紛紛絲竹奏清時世間只有王摩詰曾解傷心凝碧池
重午寄餘亭夜集留別林九

綠楊村舍閉高眠忽訝招尋尺素傳自愧人非陶處士可能文似杜樊川
人來雲影搖溪月坐處花香過竹烟記得鷓鴣詩句好公堂瀟洒有林泉
贈四明虞生餘

客裏相逢庾子山暮年聲譽擅詞壇奇書禹穴燃松探古碣娥江立馬看
賓榻高眠花自落墨池飽醮酒初闌主人爲吏清于水日餉官厨一片肝
有歎三首

人道長安好惟脂待詔車出門向西笑多恐不如初
齟齬難成寵纖腰祗自傷泪窮河滿子爭得感君王
畫錦誇歸里誰知覆一莎只教魏扶句裁作五言歌

西爽齋避暑

入戶香風細荷花六月初午無驚夢客涼有快心書山立人烟外農歌餉
酒餘翠禽斜掠處撥刺一溪魚

虞山道中見插秧

千家村落雨蕭蕭纔送泥牛急稅徭境有城狐爭避虎野無田鼠罷迎貓
鬼妻向夜登牀泣獵火驚人動地燒天若解憐貧戶口來朝稂莠盡成苗
口號和有仲

花落春殘細雨時和愁和恨一枝枝分明記得宵來夢只合東風燕子知

虞美人花和有仲

春風搖搖春雨吹紅紅白白紛紛參差白如楚殿凝粧日紅似烏江濺血時
江東景色有何好香魂化作江東草應憐子弟八千人從軍一旦為灰塵
為君歌舞為君死千古有心誰似汝拔山蓋世信英雄當日英雄安在矣
低頭問花花淚垂欲言不言長相思君不見明妃墓上寒烟碧至今青艸
無顏色

寶伯以農事歸寄示一首

竭盡書生力躬耕二畝田麥愁庭潦沒糠作杖藜然計拙全吾道時危覺
汝賢誰知鷗鷺畔一笠破溪烟

和有仲十蟲詩

米蟲

只因玉粒愛纖纖不惜將身葬釜鬻百萬倉箱誰禁汝柴桑饑殺有陶潛

蛙

池塘鴨綠漲如天鼓吹煩君伴不眠今日梨園坐何部料應博得水衡錢

蝨

北向禪居意若何蝨行腹中應道赤心多吮人膏血纔三日便與同儕作

太婆諺語三日過蝨太婆

蚊

當空圓曜靜無聲入夜薨薨到五更總有鋒芒能刺骨祇教成得露筋名

壁蟾

雕甍頽屋等無分斷盡聲聞臥白雲今日山僧誰靜坐九年面壁不如君

蠹魚

漫道香芸辟惡方殘編零落不成章逢渠即是詩書劫何必人間有始皇

蜘蛛

檐牙屋角置身遙機巧渾如壘斷招一網可憐空打盡持竿童子不曾饒

蟬

偏與炎歊六月宜綠楊攀附最高枝一鳴自覺驚人甚忘却泥丸轉糞時

紅蜻蜓

緋服朱幡結隊新曾從龍窟學潛身不知可有真龍否耀日屯雲祇悞人

螢

書偏伏處夜偏紅也有微光點碧空不是幸逢隋煬帝爭教陪從景華宮
以挿秧詩示潛在潛在連和四章備極其妙因疊前韵代述農家
之樂然亦如天寶宮人談開元舊事矣

鶴儀鳩杖髮蕭蕭共話升平減稅徭曲曲池塘晴鬪鴨離離花影晝眠猫
紅鱗味美開窗釣紫芋香生就地燒春社始過秋社近懷新門外見良苗
雨後同潛在梅仙師周論詩池上

雨和花共墮蹴處欲成蹊翠愛藤蘿合香知菌萑齊山晴何處鳥村午一
聲雞共啜敬亭茗論文日未西

寄饒隱庵勝公

月落空江夢所思清風祇許鷺鷗知花邊餘課兼鋤藥画裏禪機更得詩
翠竹有聲涼雨後青山無恙晚霞時珠林亦是炎涼路誰走荒郊拜勝師
貧況

范家甌釜以拚塵之死何曾怨苦辛祇是近來貧到骨每逢中夜淚沾巾
盪耕酒盡攢眉婦炊黍烟寒禿髮親更有征徭無計避柴門黃犬吠聲頻

和友人夏日喜雨次韵

桔槔聲亂火雲初忽有涼颺暑氣除雨洗萬花香片片烟籠一鳥去徐徐
南隣荷笠微含笑西塾分秧且廢書願得碧翁知此意早教遺穗滿菑畬

梅村學士生日詩四首

天下文章今在茲杜詩韓筆是吾師談長萬丈下言外衰起諸家八代時
隸草通神花共落丹青得意鶴先知風流已合人人醉曲誤能看更阿誰
五十荀卿又見茲故應再作瞽宗師高僧鄧尉求銘日都講長安獻賦時
花下麗詞妃子笑座間新句雪兒知清朝若要脩唐史眼底廬陵試問誰
竹箭東南總聚茲侯芭應得問奇師驪龍尚記探珠日金馬方逢避世時
夜露含情隋柳見春花感泪蜀鵲知中原天爲留文獻耆舊于今定屬誰
玉馬金貂肯戀茲鑑湖投老是心師差掛絳帳春風裏管領青山夜月時
玄晏序成天下重子山詩在後人知雞林海外傳名姓不問梅村又問誰

懷州人杜若洲

多情最憶杜樊川蕭瑟能將麗句傳人比暮雲愁不斷心同秋月恨難圓
身謀去任備書研家計盈虛撲滿錢今日麒麟都作脯蒙莊山木老天年
殷重齋賞牡丹

入門先覺一庭春萬卉羣葩與作臣薄捲翠帷籠不語高燒紅蠟照無塵
風生鳳閣含香吏光射龍池侍讌人錯比傾城有遺恨擬將心事叩花神
端士謁選北行次烟客先生韵送別四首

三千客路一孤蓬愁聽江流只向東鼓發五更何處月笛吹今夜故人風
酒尊欲盡青山合漁火初明碧水空添得別離多少恨戍笳城角亂雲中
人心長恨有波瀾世事于今眼倦看張祐悔歌年少樂鮑溶重唱路行難
鑊錐利向盤根見驟駟才因遠道殫莫但瞻雲頻洒淚好將勛業當承歡
無恙輕帆去不驚河聲山色若為迎巧知不向天孫乞名豈徒容孺子成
白雁暮同雲外宿碧溪晴在鏡中行平生志業思伊呂忍使江漁笑獨清
陳登湖海氣曾豪被髮年來續楚騷廣武淚教何地哭漁陽槌合有時操

自知薄命多兼病敢道逃名浪得高珍重十年同學苦方剛休歎獨賢勞

弔淮南李平子

大雅風微賴有君關山秋月思氛氳誰知一夢歸流水却送孤心入斷雲
江上落花春已去天邊哀雁暮偏聞簡君遺墨無窮恨小札殷勤細論文

寄瑞五

半日耽書半日眠靜來禪悅動來仙布衣三教吾家事今日都歸葛稚川

陳陶自號三教布衣瑞五亦號

遲李映碧先生渡江不至

美人渺渺隔江流有約相過肯放舟皓月乍傳千里思碧雲先散一天愁
仙帆只想迎元禮玉軸誰知戀鄴侯何日西窗聽夜雨一編心史續陽秋

懷義興丘文蔚

誰更交情似汝真亂離愁殺四方身跡同王粲家安在魏類方干命不辰
雲散風流何處雨鳥啼花落幾回春衡門柳色依然綠不見相思命駕人

題秋孫述詩三首

檀園曾是浣花堂，剩有風流奕葉香。人遇二珠驚解珮，月明一乘照催粧。
浴綈消渴貧司馬，愁愛多情瘦沈郎。比欲爲君傳獨行，轉令人廢蓼莪章。
秋

面山背水一茅堂，中有詩人花艸香。水帶雒妃離合意，山分西子淡濃粧。
已耽微尚歸盤谷，應寄愁心到夜郎。賦就銀河誇織女，幾回機杼不成章。

題王太常爲馬退山畫扇

亂雲生處萬山開，短屋疎籬樹色迴。曾累高人黃子久，片帆烟雨尚湖來。

擬唐人送宮人入道二首

朝卸紅梳下未央，晚衣霞帔拜星光。鳳凰近學從仙史，鸚鵡曾聞說上皇。
獻曲尚疑金管奏，繫符猶見絳紗香。桃花玉洞千年藥，莫遣人間賺阮郎。
明于秋水澹于霞，拜謝昭陽別有家。不向楚王行暮雨，但隨毛女浣春花。
衣裁薜荔拋條脫，冠戴芙蓉却鈿車。何似雷塘埋殿脚，夕陽惟見玉鈞斜。

王研存進士生日詩

曲江春色炤衣裾，鞞鼓漁陽動地初。皂帽便爲千古計，青門已臥十年餘。

研存釋褐不受官卽歸故里漢家避世無金馬，唐寢傷心有玉魚。不是適逢閒歲月，誰容玄晏老耽書。

下周臣中翰生日詩四首

束髮論交覺汝賢，才如風發思如泉。誰知書著窮愁日，已是人當強仕年。
規矩高曾思舊德，墳篋兄弟見新篇。烽烟不用頻搔首，綈几焚香卽地仙。
著述功臣繫聖賢，小窗松火雨餘泉。雙星天上渾如歲，疑在二日一日人間也。似年北闕久吟牀，下句南華先注馬。蹄篇鏡湖別業東，臯在賀監風流一飲仙。

沙蟲猿鶴果誰賢，何處堪求洗耳泉。雞舞劉琨驚午夜，羝歸蘇武歎丁年。綴

文早擅無雙譽，學易今占第一篇。奚必桃源問津去，擁書南面是神仙。

五嶽何能讓昔賢，興來隨意坐流泉。筆牀茶竈尋春日，布襪芒鞋秉燭年。

雪裏綠蕉摩詰畫，山中叢桂八公篇。尚湖曾有楓林約，人道陶家又一仙。

和虹友懷漢槎次漢槎獄中元韻

秋風鳴鳩化啼鳩，逝水雙丸送白頭。曾記去年花裏別，豈知今日籠中囚。

麒麟出易終非瑞鸚鵡才高正得愁最是唐家知愛士一官猶許慰荒丘

次和李義山無題詩

何處香雲習屣蹤夜闌花潤一聲鐘杜鵑有泪春應老鸚鵡無言思正濃
曾是別離將芍藥更誰消息到芙蓉卿來帶水非爲遠卿不來時遠萬重

偶成

纔見開花又落花月初東上日西斜人心到底如書版印盡千差與萬差
久不寄省公詩適殷重贈省公扇賦此書之

共作天涯一冥鴻范家塵甑料應同秋逢病後無詩寄夜入愁邊有夢通
挾彈馬過門閉處吹簫人立月明中大來善簫冰心自合銷殘暑況有相遺兩
袖風

見殷重近詩寄贈

三十年來共學情濬川喜見勒功成只今誰是高常侍晚歲吟詩得盛名
病中寄天御時亦臥病

白髮下今已不公更堪高枕故人同愁來藥內君臣在老去人間得喪空

忽斷蟬聲纔覺雨漸疎梧葉始知風一潭秋露芙蓉晚不及招尋醉碧筒
患眼

看花却似霧中行對酒還嫌絳蠟明桐葉一庭書萬卷只將詩句和秋聲
和虹友讀武昌女子詩四絕句

濁浪朝朝動地來香魂一去幾時回從今招屈亭前水競渡應兼爲汝哀
吹盡參差木葉秋無情湘水到今流當時白向蒼梧死君爲何人更覺愁
女子何曾解立名亦知一死重于生明妃只怨君恩薄那有含羞地下情
武丘西舫去如龍爭酹真娘古墓中拚得將身葬魚腹可容男子吊春風
附虹友原倡

去年鉦鼓動漁陽今歲飛旌下武昌同與屈原葬魚腹武關何處問懷
王

年年恨血楚江波黃鶴磯頭月色多若與湘君同鼓瑟傷心應唱玉關
歌

江心血淚濺羅衣空有香魂夜夜歸猶幸窮泉不相見不然愧殺漢明

妃

苦調人間未有雙遺鈿何處水宗宗真娘尚有題詩者誰爲傷心弔楚江

飲元又齋卽席贈別同虹友伊人限先字韵

白疊高冠坐少年與來今夜醉君前金尊錯落花無語銀燭銷殘月正圓
別去幾時來早雁送歸一路入秋蟬趨庭他日如相問爲說邊韶只愛眠

秋日獻烟客先生

花護書巢艸覆庭墻東人坐一簾青魚牋硯落新裁句虎觀家傳舊賜經
十賚定承天上誥四休初記谷中亭只今便是高陽里更有何門聚德星

叠前韵和烟客先生西田詩四首

一片秋光落戶庭隔烟遙見數峰青溪頭人語蟬聲亂雨後苔痕鳥篆經
紅愛晚香荷艷艷翠看高節竹亭亭瑤池若降西王母定指人間有歲星
稻花香細入空庭雨過平疇分外青二仲到時桑落酒八關齋日貝多經
芙蓉綽約王維洗楊柳扶疎白傅亭遙想披襟深坐處夜涼人定一池星

雲影溪光共一庭梧桐初下薜蘿青添成高士求魚具註就仙人相鶴經
自有丹青題謝障誰云玄白笑楊亭比來學化莊周蝶栩栩何愁兩鬢星
雙扉習靜閉秋庭佛火長懸炤帝青菊品新添先入譜茶香罷鬪已成經
夢魂想到慈恩院名姓應垂麗句亭邊報差除都不管無煩術士問三星

投宿西田又叠前韻題壁

濛濛花柳掩門庭約略疎籬帶露青犬吠一燈驚獨立竹開三徑記曾經
眠分孺子來時榻掃學林宗去後亭十里望衡知不遠早涼歸棹滿溪星
秋日東郊遊曠得歌字

朝川幽事近如何布襪青鞋有客過山鳥去臨秋水見林蟬聲向夕陽多
風吹画舫從鷗鷺月吐朱樓炤芰荷豈爲罰依金谷酒一時離席動高歌
再訪李研齋太史不遇留贈

去住如鷗又十年故山萬里隔風烟當筵尚憶卮筒酒得句還書蜀錦箋
研齋侍從昔爲天上客隱淪今作市中仙昇簋蕭寺重相訪門掩花深思
惘然

寄懷殷元修

風塵回首恨難裁此日江南庾信哀
衰鳳只成車下諂臥龍空老龍中才
烟和艸色經秋冷雨送蟬聲入暮來
一水盈盈勞佇立短筇吟遍釣魚臺
馬退山入村乞余作生傳疊蕭字韵
見贈因次答一首

荒烟漠漠艸蕭蕭似入深山好避徭
客欲到門喧樹鵲魚纔舉網過隣貓
嘲君遺粟空求傳笑我含毫苦未燒
別後布帆何處去青青一路立新苗
雨後懌民齋小集見其新詩

雨後秋光分外清蕭蕭梧竹亂檐楹
花飄石畔香猶泫霞落天邊晚更明
玉軸堆牀三代物金尊炤座一宵情
誰能吟就城傍曲應許龍標得盛名

懌民齋傍北巖

次和懌民詩同梅仙作

侵檐石色冷苔衣年少風流坐陸機
文債未能消慧業酒兵早已破愁圍
尊前風入疎桐亂雨後烟籠片月微
最是玉山頽放處一聲白雪和人稀
秋日寄題秦叔霄馨館

遙知芸閣畔萬卷一匡牀山色分秋
雨湖光動夕陽風詩歸大雅燈火及
新涼解得霄馨意無言桂子香

寄懷登善

匹馬燕山兩度秋朝衣誰與護香篝
看花不入劉郎觀愛月偏登謝朓樓
官屋席逢中夜召春陵詩為一隅憂
故人豪氣空湖海野水茫茫炤白頭
鴻逸齋聽雨

十里橫塘路瀟瀟阻客行連宵驚枕
夢盡日亂碁聲翠惜盆荷敗青知砌
艸生只愁栖隱處野漲一時平

寄懷吳茂長

故人家住練祁東雙鯉頻將尺素通
幾欲放舟尋夜月可堪高枕怯秋風
里符征賦村村急獵火燒天日日紅
回首揚州成一夢謝山蕭瑟庾樓空

茂長故在史閣部幕中

端和上人乞銘母塔書此贈之

烟靄蒼蒼護一關秋來片月炤君閒
策勛舊記姑蘇寺及第今歸鄧尉山

端和初在北禪寺建對客坐教心火靜乞銘時帶泪痕還遙知午夜空堂
大眼今為玄臺上對客坐教心火靜乞銘時帶泪痕還遙知午夜空堂
夢只在白雲孤塔間

夜聽吳飲和彈琴

銀漢迢迢北斗橫九華入夢不勝情
翻韻外秋山松籟含風細寒澗泉
流挾雨清能使四筵如靜女似從
六代見咸諷曲終定笑湘靈瑟空
向人間寫不平

哭江俊求四首

生死交情泪萬行寢門一哭路人狂
風流已失周公瑾憂思能傷盛孝章
花似為君春寂寂月如無主夜茫茫
男婚女嫁猶餘事白髮衰親歎北堂
延英開社麗如雲珠樹堂中張一軍
補鹿吾先生于珠夢去五花生綠
筆迎來一笑出紅裙羽觴向月深深
醉檀板臨風緩緩聞今日哭君思不
得重重哀感淚紛紛

君家舊宅久蕭蕭還傍虹飛南市橋
春去梁間無語燕秋來池上有鳴蜩
壞墻蘚没行人路老檜烟寒故國條
最是多情惟艸木年年紅淚落芭蕉

亂餘踪跡寄江村廢盡田園十畝存
稚子習畊長荷耒里胥催賦夜過門
遺家止有殘書篋盛酒兼無老瓦盆
地下可知長不瞑哀哀孤寡怨黃昏

二泉書院落成詩寄桴亭

萬樹松烟萬壑聲空山書院落初成
千年俎豆尊先進一代人文律後生
王佐只今誰董仲經明當世少匡衡
故人高枕荒江畔涼月秋風無限情

寄江升士

田家兄弟只三人白首相依對紫荆
窮殺俊求歸糞壤饑驅虞九入燕京
一村戶口荒餘盡五歲官租赦後征
料得秋來明月夜也將歎息助蛩聲

和竇伯雨中雜詠

向日葵

託根秋氣合先悲敢怨羲和得馭遲
消受淒風并苦雨孤心端不要人知

白頭公

啼殘花下三春露叫破枝頭五夜霜
秋雨離離還自語笑他鶯燕為人忙

桂花

天香蕭瑟雨中開漠漠秋雲暮色催只恐金風易憔悴可能留得一枝來

附寶伯原倡

辛勤衛足留根在宛轉當階待日來可惜秋風連夕雨此心應向阿誰

開向口葵

孤立寒烟花色慘啼深秋雨頂毛摧新鶯休遂輕頭白曾見春和麗日

來白頭公

葢含秋露葉籠烟得得濃香滯遠天莫訝荆榛荒桂路花開經雨已多年

桂花

吳錦雯司李新任吾郡承其枉駕不能走答賦贈六首

片帆風送闔閭城翠蓋朱轡候騎迎已有才名推國士豈無經術為蒼生
刀能切玉操時見瑟欲調弦解後更吏治近來多粉飾吳儂矯首望澄清
十分財賦五東南約略姑蘇郡又三胥為催科多害馬農因剗肉誤春蠶
不知他邑誰稱母却喜吾州獨字男料得下車先問俗早將朱墨記廉貧
聲華曾動越王臺教化今應取次開橋外衣冠扶杖至堂前車馬抱經來

行同孺子方真士文類相如未是才人物可知逢水鏡滿門桃李一時栽
誰云司李一官輕青史前修記載明夷簡宏材終作相建封直節早知名
擊蛇立破人間惑造印能求法外生萬里只今纔發軔低回千古不勝情
縱囚舊讀歐公論尚德還傳路史書但使有文懲黠鼠何妨疎網漏窮魚
惠心定合兼寬猛弊政應教一掃除慙愧干旄空見枉贈言聊當報瓊琬
十年相憶思騰騰欲拜車塵病未能饑似凍蠅妻子笑拙如窮易世人憎
二毛顛悴魚蝦侶一榻蕭條粥飯僧聞道獨留青眼在不將苛禮責陳登

簡呼德下

平林流水帶茅堂蔣徑深深半就荒一路曉烟魚虎去滿庭秋雨豆花香
伯休賣藥青囊在玄晏耽書白髮長料得詩成琴靜後研田纍纍小兒忙

九日懷默庵因重題其菊隱圖

空潭秋老盡芙蓉想到蓬蒿仲蔚居三徑黃花香細細半堦紅葉影徐徐
傷心句出高樓上冒雨詩吟破帽餘不覺窮愁多歲月案頭已少未成書

題夢園

元家終日在樓臺王領林泉宰相才魚狎画船眠水荇鶴依邛杖立庭苔
蒼頭抱甕花間出紅袖添香月下來夜半聞鐘沈夢醒蠅頭蝸角付深杯
表姑母曾太孺人八十

衰親鶴髮填篋少喜有吾姑話昔年曾見五朝全盛代誰家四世一門賢
世情漸覺貧來好人事無如健是仙十月小春天氣煖玉壺爭獻早梅前
寄懷朱近脩

停橈剪燭記吳閫別後相思特地長夜雪有心雲黯黯秋鴻無路月茫茫
緣溪漁網家家酒落戶縲車樹樹桑我欲向君尋舊約巨卿雞黍莫教忘
程翼蒼翰林出為郡博修郡學成寄贈二首

堂前書帶入秋深門外衣冠見盍簪經學講論開虎觀文章名姓動雞林
炬光尚作金蓮燄珮響還含玉署音此日已知稽古力不教絲竹歎銷沈
郡學荒蕪不記年蕭蕭古栢草芊芊射亭礎斷樵蘇路頽水泥渾浴馬泉
誰損橐餗成盛事重教簾業奏新懸一瓊盡視如傳舍始信三魚屬大賢
懷屠闇伯

曾從蕭寺話深更客歲相逢恨別輕心似落英隨水去人如明月入懷清
帷中董仲成繁露枕上王充得論衡聞道春風開講席抱經函丈走門生
懷義扶

檄下江南征賦急遙知愁緒到田廬西山花信曾攜酒北闕風塵懶上書
義扶不上公竹塢棋聲秋雨夜湖天詩思落霞初可憐昏嫁還同累五嶽
車看梅西

遨遊志尚虛
愛妾換馬
燕趙佳人冀北驄各將心力事英雄酬恩一死情應並得意千金價正同
今夜玉釵辭暮雨明朝珠勒踏春風亦知美色人人愛要為君王立大功
宿無垢園贈寓上人

雲木蒼蒼遠陌塵綠谿魚鳥日相親敲檐翠竹曾秋雨落戶青山似故人
琴靜壁間蟲響細燈殘窗上月華新夜深聳得吟肩瘦應許詩家拜後身
簡侯紀原研德

羊裘零落釣臺星尚許江潭歎獨醒四海才名推二陸一時人物指雙丁

黃芽骨化蘇門嘯研學仙德青火光搖座右銘紀擬聞道東籬多種菊可容乞取制頽齡

茂長扇頭得玄咫詩寄懷一首

甘與紅霞結近隣桂叢空賦小山頻養生論就稽康懶屏跡詩成杜甫貧攜手春風思野寺傳杯寒夜記江津憑君佳句添惆悵青草池塘見故人

史曉瞻同年觀察浙西以書招予不能往寄贈二首

放浪江潭鬢已華誅茆栽芋作生涯故人早跨揚州鶴老我徒成井底蛙宦跡近傳清似水詩心聞更麗于花何時烟雨樓重建收拾湖光萬頃斜羊公緩帶祭公歌調劑軍民費揣摩澤國桑麻行卧穩訟庭烏雀往來多龍旂曉颭清風遠虎帳晴開麗日和欲向鴛湖尋釣艇蔚村烟月冷如何

梅村齋頭看菊印席作

綺筵排日向花開五色繽紛入幕來香遶画欄人不語光搖銀燭酒頻催碑題黃絹中郎學籠蓄丹砂吏部才成得陽秋書一卷茫茫往事使人哀

時輯闕賦事將竟